

সাহিত্য-সাধক-চরিত্রমালা—১২

অক্ষয়কুমার দত্ত

শীরজেন্মাথ বল্দ্যোপাধ্যায়



বঙ্গীয়-সাহিত্য-পরিষৎ

২৪৩১, আপার সারকুলার রোড

কলিকাতা

সাহিত্য-সাধক-চরিতমালা—১২

অশ্বয়কুমার দত্ত

১৮২০—১৮৮৬

অঙ্গরাজুমার দ্বি

শ্রীরঞ্জনাথ বল্দোপাধ্যায়



বঙ্গীয়-সাহিত্য-পরিষৎ

২৪৩১, আপার সারকুলার রোড

কলিকাতা

প্রকাশক
শ্রীরামকুমাৰ সিংহ
বঙ্গীয়-সাহিত্য-পৱিত্ৰণ

চৈত্র ১৩৪৮
মূল্য চারি আন।

৫১-৬৬১
Acc 22280
29/01/2006

মুদ্রাকৰ্ম—শ্রীসৌমিত্রনাথ দাস
শনিবার প্রেস, ২৭১২ মোহনবাগান রো, কলিকাতা

২২—১৪।১২।৪২

অক্ষয়কুমার দত্ত

বাংলা গঢ়-সাহিত্যের প্রথম যুগে যে দুই জন শিল্পীর সাধনায় বাংলা
ভাষা সাহিত্য-কৃপ পরিগ্রহ করিয়াছিল, তাহাদের এক জন ঈশ্বরচন্দ্ৰ
বিদ্যাসাগৰ ও অন্ত জন অক্ষয়কুমার দত্ত। ঈশ্বরচন্দ্ৰ সংস্কৃত, হিন্দী ও
ইংৰেজী সাহিত্য-পুস্তককে আদৰ্শ করিয়া যে-কাৰ্য্য করিয়াছিলেন,
অক্ষয়কুমার ইংৰেজী বৈজ্ঞানিক ও দার্শনিক গ্রন্থের আদৰ্শে ঠিক সেই
কাৰ্য্যই সাধিত করিয়া গিয়াছেন। এক জন রসসাহিত্যমূলক এবং অন্ত
জন বিজ্ঞান ও যুক্তিমূলক ভাষার সাহায্যে একই কালে মাতৃভাষার
সাহিত্যসম্পদ বৃদ্ধি করিয়া গিয়াছেন। আমৰা এই কারণে এই দুই জন
সাহিত্য-সাধকের এক জনকে স্মৰণ কৰিতে গিয়া অন্ত জনকেও স্মৰণ
করিয়া থাকি। গোড়াৱ দিকেৱ অন্ত সকলেৱ নাম বিশ্বত হইলেও
ঈশ্বরচন্দ্ৰ ও অক্ষয়কুমারকে যত দিন বাংলা ভাষা জীবিত থাকিবে, তত
দিন স্মৰণ রাখিতে হইবে।

বংশ-পরিচয় ; বাল্যজীবন

অক্ষয়কুমাৰ দত্তেৱ বংশ-পরিচয় ও বাল্যজীবন সম্বন্ধে ‘অক্ষয়-চৱিতে’*
যাহা লিখিত আছে, নিম্নে তাহা উক্তত হইল :—

দুর্গাদাস দত্ত দত্তবংশেৱ আদি পুত্ৰ। ইহার পুত্ৰ শিবরাম।
শিবরামেৱ রাজবল্লভ ও রমাবল্লভ নামে দুই সন্তান হয়। রাজবল্লভেৱ
চারিটি পুত্ৰ ;—১ম, রামরাম ; ২য়, কৃষ্ণরাম ; ৩য়, রাধাকান্ত ; ৪ৰ্থ,
রামশৱণ। ইনি বৰ্দ্ধমান-রাজবাটীৱ এক জন কৰ্মচাৰী ছিলেন। ইনিই
প্ৰথমে টাকীৱ নিকটবৰ্তী পুঁড়াগ্ৰামেৱ সন্নিহিত গৰ্বস্থপুৰ হইতে আসিয়া
পূৰ্বে নদিয়া এক্ষণে বৰ্দ্ধমান জেলার অস্তৰ্গত পূৰ্বস্থলী গ্ৰামেৱ সন্নিকট
চুপীতে বাস কৱেন।...ৰামশৱণেৱ পাঁচ পুত্ৰ ;—১ম, পদ্মলোচন ; ২য়,
কাশীনাথ ; ৩য়, চূড়ামণি ; ৪ৰ্থ, পীতাম্বৰ ; ৫ম, কৌর্তিচন্দ্ৰ।.....দত্তৰা
বঙ্গজ কায়স্ত। চুপীৰ যে স্থলে ইহাদিগেৱ বাস ছিল তাহা এক্ষণে নদীৰ
গৰ্ভে।

অক্ষয় বাবুৰ পিতা পীতাম্বৰ দত্ত মহাশয় অতি পৰোপকাৰী, দয়ালু
ও সুন্দৰ প্ৰকৃতিৰ লোক ছিলেন। ইনি সামাজ্য বাঞ্ছালা মাত্ৰ জানিতেন।
খিদিৱপুৱেৱ টলিজ, নলার (আদি গঙ্গাৱ) কৃতঘাটেৱ কেশিয়ৱ ও দারগা
ছিলেন। এই কৰ্ম কৱিয়া কিছু সংস্থান কৱিয়া যান।...ইহার আতুষ্পুত্ৰ
...হৱমোহন দত্ত [কাশীনাথেৱ পুত্ৰ] তথনকাৰ সুপ্ৰীমকোটৈৰ মাষ্ঠাৰ
আপীসেৱ বড় বাবু ছিলেন।...ইনি পীতাম্বৰ দত্ত মহাশয়েৱ নিকট চিৱ
ঝণী, যেহেতু তিনি উহাকে লেখা পড়া শিখান এবং উহার ভৱণপোষণেৱ
সমুদয় ব্যয় আপনাৰ ক্ষক্ষে লইতে কুত্রাপি কুষ্ঠিত হন নাই। হৱমোহন

* নকুড়চন্দ্ৰ বিদ্বাস : ‘অক্ষয়-চৱিত’ (ভাৰ্জ ১২৯৪ সাল)। এই পুস্তকেৱ
“পূৰ্বভাৰত” প্ৰকাশ, “অক্ষয় বাবুৰ আজীবনবৰ্গ, শ্ৰী—ৱ, ও পণ্ডিতবৰ শ্ৰীসুৰচন্দ্ৰ
বিজ্ঞাসাগৰ প্ৰভৃতি মহোদয়গণ আমাকে এ বিষয়ে বিশেষ সাহায্য কৱিবাছেন।”

বাবুও যে অক্ষয় বাবুর শিক্ষাদির সমস্ত ভার গ্রহণ করিয়া তাহার পিতৃখণ্ড কিয়ৎ পরিমাণে শুধিতে সমর্থ হইয়াছিলেন, তদ্বিষয় পরে বিবৃত হইবে।

অক্ষয় বাবুর মাতার নাম দয়াময়ী ছিল। কৃষ্ণনগরের নিকটবর্তী ইট্টলে নামক গ্রামে তাহার পিত্রালয় ছিল। পিতার নাম রামদুলাল গুহ।..... ১২২৭ সালের ১লা আবণ [১৫ জুলাই ১৮২০] শনিবার শুক্ল পক্ষ পঞ্চমী তিথিতে রাত্রি অনুমান ৬ দশের সময় চুপীতে অক্ষয়কুমার জন্ম গ্রহণ করেন।...

আমাদিগের দেশের প্রথানুসারে পাঁচ বৎসর বয়ঃক্রম কালে অক্ষয়কুমারের বিদ্যারম্ভ হয়।... ইহার পিতা গুরুচরণ সরকার নামে জনৈক গুরু মহাশয়কে বেতন দিয়া বাটীতে রাখেন। গুরুচরণ সরকার অতি চমৎকার শাস্ত্র প্রকৃতিব লোক ছিলেন। ইনি ছাত্রবর্গকে প্রহার করা দূরে থাকুক কথনও কাহাকে তিরঙ্কার করিয়াছিলেন কি না সন্দেহ। পিতা মাতা ও শিক্ষকের স্বভাব, সদাশয়তা ও সদয় ব্যবহার প্রথমে ইহার শিক্ষার অনুকূল হইয়া তৎপরে ইহার ভাবী জীবনে প্রতিফলিত হইয়াছিল।... চারি বৎসর পাঠশালায় ঘাস শিখিবার শিখিলেন। এক্ষণে আমরা যেকপ আগ্রহ ও যত্নের সহিত ইংরাজী অধ্যয়ন করিয়া থাকি, পূর্বে সম্বংশীয়েরা তদ্বপ আগ্রহ ও যত্নের সহিত স্ব স্ব সন্তানদিগকে পার্সি ভাষা শিখাইতেন। ইহার কারণ তথনও এই ভাষায় বিচারালয় প্রত্তি যাবতীয় রাজকীয় কর্ম নিষ্পন্ন হইত। আমিউদ্দীন নামে একজন মুসীর নিকট ইনি পার্সি শিক্ষা করিতে আরম্ভ করেন। পণ্ডিত শ্রীহর্গাদাস গ্রামরত্নের সহিত গোপীনাথ তর্কালঙ্কারের (ভট্টাচার্যের) নিকট টোলে সংস্কৃত অধ্যয়ন করেন।.....

অক্ষয়কুমারের বয়স ষথন ন্যূনাধিক নয় বৎসর তথন ইংরাজী শিখাইবার জন্য হরমোহন বাবু উহাকে খিদিরপুরে আনয়ন করেন। এখানে জয় মাষ্টার (জয়কৃষ্ণ সরকার) ও গঙ্গানারায়ণ মাষ্টার (সরকার)

অক্ষয়কুমার দত্ত

নামে তখনকার বিখ্যাত হই জন ইংরাজী শিক্ষক ছিলেন ।...হরমোহন বাবু প্রথমে অক্ষয়কুমারকে জয় মাষ্টারের নিকট ইংরাজী পড়িতে দেন । ইহার নিকট পড়িয়া সম্পৃষ্ঠ না হইয়া উনি নিজে একজন পাদবীর নিকট পড়িতে যান । পাদবী সাহেবের নিকট অধ্যয়ন করিতে করিতে খৃষ্টীয়^১ ধর্মের প্রতি উহার কিছু বিশ্বাসের উপক্রম দেখিতে পাইয়া পাছে খৃষ্টীয়ন হন এই ভয়ে উক্ত বাবু আপনি কিছু দিন প্রত্যহ সন্ধ্যার সময় উহাকে পড়ান । সময়াভাবে স্বয়ং অধিক দিন পড়াইতে অক্ষম হইয়া তিনি হরিহর মুখোপাধ্যায় নামে আপনার আপীসের জনেক কেবাণীর নিকট পড়িবার বন্দোবস্ত করিয়া ভাইকে সঙ্গে করিয়া আপীসে লইয়া যাইতেন ।...এইপ্রকারে কিছু দিন অতিবাহিত হইল । পড়িতে পড়িতে ইহার জ্ঞান-পিপাসা ক্রমশঃ বৃদ্ধি হইয়া কেমন করিয়া উত্তমরূপে ইংরাজী শিক্ষা লাভ করিবেন এই চিন্তায় অহর্নিশ ইনি চিন্তিত থাকিতেন ।

আতার আগ্রহাতিশয় দেখিয়া হরমোহন বাবু ওরিএণ্ট্যাল সেমিনারিতে তাহার পড়িবার নিমিত্ত বন্দোবস্ত করেন । এখন যেমন ট্র্যাম্ ও গাড়ি ঘোড়ার স্মৃতিধা, তখন সেকুপ ছিল না ।...এই সকল অস্মৃতিধা নিবন্ধন হরমোহন বাবু দেখিলেন যে, প্রত্যহ খিদিরপুর হইতে কলিকাতাস্থ সেমিনারি পড়িতে যাওয়া বা দেওয়া বড় সহজ কথা নহে । কলিকাতা, দর্জিপাড়ায় তাহার পিশতুত ভাই রামধন বস্তুর বাসা বাটী ছিল । ইহার বাসাতে তাহাকে রাখিয়া ইনি তাহার লেখা পড়ার সমস্ত ব্যয় নির্বাহ করিতে লাগিলেন ।...হার্ডম্যান জেফ্রয় নামে একজন ইংরাজ তখন গোরমোহন আচ্যের স্কুলের কর্তৃপক্ষীয় ছিলেন । সাহেব মহোদয় স্কুলগৃহে অবস্থিতি করিতেন । অক্ষয়কুমার প্রাতে ও সন্ধ্যার সময়ে ইহার নিকট কিছু গ্রীক লাটিন হিন্দু ও জর্মণ ভাষা অধ্যয়ন করিতে যাইতেন । পঠনশায় ইনি প্রচলিত হিন্দু ধর্মের প্রতি বীতরাগ হন । ইলিয়ড, বর্জিল, পদাৰ্থ-বিজ্ঞা, ভূগোল, জ্যামিতি, বীজগণিত, ত্রিকোণমিতি,

উচ্চ অঙ্গের গণিত শাস্ত্র, বিজ্ঞান মনোবিজ্ঞান ও ইংরাজী সাহিত্য বিষয়ক ভাল ভাল গ্রন্থ অল্প বা বিনা সাহায্যে অধ্যয়ন করেন। বিজ্ঞানের প্রতি ইহার স্বতঃসিদ্ধ অনুরাগ ছিল।

আগড়পাড়া নিবাসী পবলোকগত রামমোহন ঘোষের দ্রহিতা নিমাইমণির (শ্রামামণির) সহিত ইহার বিবাহ হয়। এই সময় ইহার বয়স অনুমান পঞ্চদশ বৎসর মাত্র।.....

ওরিএণ্ট্যালে পড়িতে পড়িতে একটি দুর্ঘটনা হয়। ইহার বয়ঃক্রম যখন উনবিংশ বৎসর তখন কাশীতে ইহার পিতার মৃত্যু হয়।...

পীতাম্বৰ দক্ষজ জীবদ্ধাতেই ও তাহার স্ত্রীর হস্তে কিছু সংস্থান সত্ত্বেও হরমোহন দক্ষজ সংসার চালাইয়া আসিতেছিলেন। সংসার যেমন চালাইতেছিলেন সেইকপ চালাইতে আর ভাতার লেখা পড়ার সমস্ত ব্যয় নির্বাহ করিতে ইনি স্বীকৃত হইলেও মাতার পরামর্শে অক্ষয় বাবু বিষয় কর্মের চেষ্টা করিতে প্রবৃত্ত হন।...মাত্রাজ্ঞার বশবর্তী হইয়া অতি অনিচ্ছায় ইহাকে বিদ্যালয় পরিত্যাগ করিতে হইল। ওবিএণ্ট্যালের দ্বিতীয় শ্রেণী পর্যন্ত অধ্যয়ন করিয়াছিলেন। বিদ্যালয় পরিত্যাগ করিতে হইল বটে, কিন্তু ইহার শিক্ষাভিলাষ কখনও হাস হয় নাই। সুতরাং একদিকে যেনেপ অর্থাগম ; অপর দিকে সেইকপ জ্ঞানোন্নতির জন্য সাধ্যমত চেষ্টা পাইতে লাগিলেন।...হবমোহন বাবু আইন জানিতেন। ইনি ভাতাকে আইন পড়িতে বলিলে তিনি উত্তর করিয়াছিলেন “যে বিষয় পরিবর্তনীয়, তাহা শিক্ষা করিলে লাভ কি ?” বিষয় কর্মের চেষ্টায় এই প্রকারে ইতস্ততঃ করিয়া কিছু দিন গত হইল।

ঈশ্বরচন্দ্র ওঁরে সহিত পরিচয়

এই সময় অক্ষয়চন্দ্র গুপ্ত-কবির সহিত পরিচিত হন। ‘অক্ষয়-চরিতে’ প্রকাশ :—

সুপ্রীমকোর্টের বিজ্ঞাপনাদি প্রায় সমস্ত কাষ্য বাবু হরমোহন দত্তের হস্তে গৃস্ত ছিল। প্রতাকর পত্রিকার জন্য ঐ সমস্ত বিজ্ঞাপন হস্তগত করিবার মানসে তাহার সকাশে ঈশ্বরচন্দ্র গুপ্ত মহাশয়ের গতিবিধি ছিল। বরাবর যাতায়াতে ইহার সহিত তাহার বন্ধুতা জম্মে। এই বন্ধুতা নিবন্ধন অক্ষয় বাবুও ইহার নিকট পরিচিত হন। এতদ্বিন্দি, রামধন বন্ধুর বাটীর সন্নিকট নরনারায়ণ দত্তের বাটীতে ‘বাঙালা ভাষামুশীলনী সভা’ হইত। এই সভায় ইহারা উভয়ে উপস্থিত থাকিতেন। এইরূপে ক্রমে ক্রমে ইনি কবি মহোদয়ের স্নেহভাজন হন। (পৃ. ১৩-১৪)

…[টাকীর] জমিদার বৈকুঠনাথ চৌধুরী মহাশয়ের বরাহনগবন্ধ বাটীতে “নীতিতরঙ্গী” নামে যে সভা হইত তিনি ঈশ্বরচন্দ্র গুপ্ত মহাশয়ের সহিত তথায় গমনাগমন করিতেন। কিছু দিন পরে ইহারা উভয়েই এই সভাব সভা মনোনীত হন। নামে স্পষ্ট বুঝাইতেছে যে, নৈতিক উন্নতি সাধন করাই এই সভার মুখ্য উদ্দেশ্য ছিল। সভ্যগণ কর্তৃক নীতিবিষয়ক বিবিধ প্রবন্ধ ব্রচিত ও পঠিত হইত। দত্তজর কোন কোন প্রবন্ধ পরে প্রতাকর পত্রিকায় প্রকাশিত হয়। (পৃ. ১৭-১৮)

অক্ষয়কুমার প্রথমে কবিতা লিখিতেন। ‘অনঙ্গমোহন’ নামে তাহার একখানি পত্ত-গ্রন্থ ছিল। কিন্তু কি ভাবে তাহার গত-রচনার স্ফূর্তিপাত হয়, তাহার বিবরণ ‘অক্ষয়-চরিতে’ এইরূপ আছে :—

ইনি মধ্যে মধ্যে ভাবিতেন পত্ত না গত কিসে লোকের বেশি উপকার সন্তান। একদা এবন্ধি চিন্তাকে প্রশ্ন দিবার পর ইনি প্রতাকর যন্ত্রালয়ে গুপ্ত মহাশয়ের নিকট গমন করেন। কি বিচ্ছি অনুকূল ঘটনা !

তাহার সহকারী সে দিন উপস্থিত না থাকাতে তিনি উহাকে সুবিখ্যাত ইংলিশম্যান্ পত্রিকা হইতে কিয়দংশ অনুবাদ করিয়া দিতে অনুরোধ করেন। অক্ষয় বাবু বলিলেন “আমি লিখিতে পারিব না, যেহেতু আমি কথনও গত লিখি নাই।” এই কথা শুনিয়া সম্পাদক মহাশয় উত্তর করিলেন “আমার বিশ্বাস তুমি পারিবে, নচেৎ বলিতাম না।” কি করেন লিখিলেন। লেখাটি একপ উত্তম হইল যে তাহা দেখিয়া তিনি বলিলেন “যে ব্যক্তি বহু দিবসাবধি এই কার্য করিয়া আসিতেছেন, তিনি এমত সুন্দর লিখিতে পারেন না।” যে ওজন্মনী গত রচনায় দ্বি মহোদয় অথিল বঙ্গদেশকে বিমোহিত করেন, এই সেই গত রচনার স্মৃতিপাত।
(পৃ. ১৪-১৫)

অক্ষয়কুমার ক্রমে ‘সংবাদ প্রভাকরে’র এক জন বিশিষ্ট লেখক হইয়া উঠেন। ১৮৪৭ সনের ১৪ই এপ্রিল তারিখের ‘সংবাদ প্রভাকরে’ লেখক ও অনুগ্রাহক সম্বন্ধে ঈশ্বরচন্দ্র গুপ্ত যাহা লিখিয়াছিলেন, তাহাতে “প্রভাকরের পুরাতন লেখকদিগের মধ্যে যে যে মহোদয় জীবিত আছেন তাহাদের নাম”-এর তালিকায় “বাবু অক্ষয়কুমার দত্তে”র নাম আছে।

ঈশ্বরচন্দ্র অক্ষয়কুমারের গুণমুগ্ধ ছিলেন। অক্ষয়কুমারও তাহাকে নানা ভাবে সাহায্য করিতেন। ইহার একটি দৃষ্টান্ত আমরা ১২৫৭ সালের চৈত্র মাসে মেদিনীপুরে রাজনারায়ণ বস্তুকে লিখিত অক্ষয়কুমারের একখানি পত্রে পাই :—

প্রভাকর সম্পাদক আপনাকে একটী প্রার্থনা জানাইয়াছেন। মেদিনীপুরের সংবাদগুলি তাহাকে লিখিয়া পাঠাইলে তিনি চরিতার্থ হইবেন, এবং আপনার নিকট ষাবজ্জীবন বাধিত থাকিবেন। ঝকড়া, মারামারি, ডাকাইতি, গৃহদাহ, চুরি, নরহত্যা প্রভৃতি যত প্রকার সর্বনাশের ব্যাপার আছে সকলই লিখিয়া দিবেন। বাস্তবিক দেখিবেন,

লিখিতে হইলে মনুষ্যের অঙ্গসমাচারই অধিক লিখিতে হইবে। এই সকলই লোকের কার্য। ইহাই মর্ত্যলোকের স্বরূপ! এ লোকে আবার নিরবচ্ছিন্ন স্বথের প্রত্যাশা!

তত্ত্ববোধিনী সভায় যোগদান

তত্ত্ববোধিনী সভাই অক্ষয়চন্দ্রের সৌভাগ্যের মূল। কি ভাবে তিনি এই সভার সভ্য হন, তৎসম্বন্ধে ‘অক্ষয়-চরিত’কার লিখিতেছেন :—

১৭৬১ শকের ২১ এ আশ্বিন রবিবার কৃষ্ণপক্ষীয় চতুর্দশী তিথিতে শ্রীদেবেন্দ্রনাথ ঠাকুর কর্তৃক তত্ত্ববোধিনী সভা প্রতিষ্ঠিত হয়। এই সময় ইহার বয়ঃক্রম দ্বাবিংশ বৎসর। সভার উদ্দেশ্য জ্ঞানোন্নতি সাধন, তথ্যানুসন্ধান, শাস্ত্রালোচনা, রামমোহন রায়ের গবেষণার উপর নির্ভর করিয়া হিন্দু এবং ব্রাহ্মধর্মের সর্বাঙ্গীন উন্নতি সাধন ও বিদ্যালয়াদি সংস্থাপন দ্বারা অশিক্ষিতদিগের নিকট ব্রাহ্মধর্ম প্রচার। কিছু দিন পরে অর্থাৎ তরা কার্তিক তারিখে ঐ সভার নাম তত্ত্ববোধিনী গিয়া তত্ত্ববোধিনী হয়। ১৭৬৩ শকে তত্ত্ববোধিনী সভা ব্রাহ্ম সমাজের সহিত মিলিত হয়।.....প্রথমে দেবেন্দ্রনাথ ঠাকুরের, তার পুর শিমুলিয়াস্ত দক্ষিণারঞ্জন মুখোপাধ্যায়ের, তার পুর হেনুয়ার দক্ষিণস্ত রমাপ্রসাদ রায়ের বাটীতে এবং সর্বশেষে সমাজ গৃহে স্থানান্তরিত হইবার পূর্বে রমানাথ ঠাকুরের ভবনে ইহার অধিবেশন হইত। উক্ত [১৭৬১] শকের ১৮ই অগ্রহায়ণ তারিখে ঈশ্বরচন্দ্র গুপ্ত এই সভার সভ্যশ্রেণীভূক্ত হন। এক দিবস সক্ষ্যাকালে তাহার সমভিব্যাহারে অক্ষয় বাবু সভা দেখিতে যান। দেখিতে গিয়া মহানুভব দেবেন্দ্রনাথ ঠাকুরের নিকট পরিচিত হন। এই পরিচয় দক্ষজর সৌভাগ্যের মূল। ইহার অব্যবহিত পরে উল্লিখিত

[১৭৬১] শকের ১১ই পৌষ তারিখে ইংৰ গুপ্তের প্রস্তাবে ও ভগবতীচৰণ চট্টোপাধ্যায়ের পোষকতায় ইনি সভ্য মনোনীত হন। (পৃ. ১৫-১৬)

তত্ত্ববোধিনী পাঠশালার শিক্ষক

১৮৪০ সনের ১৩ই জুন তারিখে তত্ত্ববোধিনী পাঠশালা স্থাপিত হয়। ৩ জুন ১৮৪০ তারিখের ‘ক্যালকাটা কুরিয়ার’ পত্রে তত্ত্ববোধিনী পাঠশালা-প্রসঙ্গে এই অংশটি মুদ্রিত হয় :—

A New School. We have been given to understand that a new School, having for its object the education of the rising youths in the vernacular languages of the country, is about to be established in Calcutta, under the auspices of some enlightened native Baboos. It is to be conducted on the same principles as the new College Patsala. The boys will further receive religious education which is a new feature in the system of native instruction. It is said that new books suited to the capacities of youth, are now in course of preparation in the vernacular languages by Baboo Debendernauth Tagore, the son of Baboo Dwarkeynauth Tagore.

অক্ষয়কুমার এই পাঠশালার শিক্ষক নিযুক্ত হন। ‘অক্ষয়-চরিতে’
প্রকাশ,—

পর বৎসর অর্থাৎ ১৭৬২ শকের ১লা [আষাঢ়] শনিবার তত্ত্ববোধিনী পাঠশালা সংস্থাপিত হইলে, ইনি ৮ টাকা বেতনে উহার শিক্ষকতায় নিযুক্ত হন। ৪ঠা শ্রাবণ হইতে বেতন ১০ টাকা হয়। তার পর ১৪ টাকা বেতনে তৃতীয় শিক্ষক হন। পাঠশালার পাঠ্য পুস্তকাবলি সভা কর্তৃক প্রকাশিত হইত। আদি ব্রাহ্মসমাজের বৃহৎ পুস্তকাগারে আমরা এই সমস্ত পাঠ্য পুস্তক দেখিয়াছি। অক্ষয় বাবু বর্ণমালা ভূগোল ও পদাৰ্থবিজ্ঞা এই দুই বিষয়ে অধ্যাপনা কৰিতেন। সভা পাঠশালার

নিমিত্ত পদাৰ্থ-বিজ্ঞা ও ভূগোল প্ৰকাশ কৱেন। ইনি ইতঃপূৰ্বে একথানি ভূগোল প্ৰস্তুত কৱেন; কিন্তু অৰ্থাত্বে বহু দিন যে মুদ্ৰিত কৱিতে অসমৰ্থ থাকেন, পৱে সভাৰ সাহায্যে পাঠশালাৰ নিমিত্ত মুদ্ৰিত ও প্ৰকাশিত হয়, তাহা তিনি স্পষ্টাক্ষৰে উক্ত পুস্তকে স্বীকাৰ কৱিয়াছেন।...

এক্ষণে যে স্থানে কালীকৃষ্ণ ঠাকুৱেৱ বাটী, সেই স্থানে তত্ত্ববোধিনী পাঠশালাৰ কাৰ্য্য সম্পাদিত হইত। ১৭৬৫ শকেৱ ১৮ই বৈশাখ তাৰিখে উহা কলিকাতা হইতে বাঁশবেড়িয়াতে স্থানান্তৰিত হইলে, তত্ত্ববোধিনী সভাৰ কৰ্তৃপক্ষীয়গণ প্ৰধান শিক্ষকেৱ পদ গ্ৰহণ কৱিয়া ইহাকে তথায় গমন কৱিতে অনুৰোধ কৱেন। ইনি স্বীকৃত হইলেন না। না হওয়াতে শামাচৱণ তত্ত্ববাগীশ ৩০ টাকা বেতনে তথায় গমন কৱেন। (পঃ ১৬-১৭)

সমাজোন্নতিবিধায়ী স্বহৃদসমিতি

সমাজসংস্কাৰমূলক কাৰ্য্যেৱ সহিত অক্ষয়কুমাৱেৱ বিলক্ষণ যোগ ছিল। ১৫ ডিসেম্বৰ ১৮৫৪ তাৰিখে কাশীপুৱে কিশোৱীঠান মিত্ৰেৱ ভবনে সমাজোন্নতিবিধায়ী স্বহৃদসমিতিৰ স্থচনা হয়। এই সভায় অক্ষয়কুমাৱ দণ্ডেৱ পোষকতায় কিশোৱীঠান মিত্ৰ প্ৰস্তাৱ কৱেন, “স্ত্ৰীশিক্ষাৰ প্ৰবৰ্তন, হিন্দু-বিধবাৰ পুনৰ্বিবাহ, বাল্যবিবাহবৰ্জন এবং বহুবিবাহ-প্ৰচলন-ৱোধেৱ নিমিত্ত সমিতিৰ শক্তি বিশেষভাৱে প্ৰয়োগ কৱা হউক।”

মহৰি দেবেন্দ্ৰনাথ ঠাকুৱ এই সমিতিৰ সভাপতি, এবং কিশোৱীঠান মিত্ৰ ও অক্ষয়কুমাৱ দত্ত ঘুংসম্পাদক ছিলেন। এই সমিতিৰ সভ্যগণেৱ মধ্যে রাজেন্দ্ৰলাল মিত্ৰ, হৱিশঙ্কু মুখোপাধ্যায়, প্যারীঠান মিত্ৰ, বৰ্সিকুৰুষ মলিক, রাধানাথ শিকদাৱেৱ নাম উল্লেখযোগ্য।*

* এই সমিতি সমৰকে বিস্তৃত আলোচনা শ্ৰীমন্মুখনাথ ষোৰ-লিথিত ‘কৰ্মৰীৱ কিশোৱীঠান মিত্ৰ’ পুস্তকেৱ ১৯-১১১ পৃষ্ঠায় জড়িব্য।

সাময়িক পত্র পরিচালন

‘বিদ্যাদর্শন’

অক্ষয়কুমার যখন তত্ত্ববোধিনী পাঠশালার শিক্ষক, সেই সময় টাকী-নিবাসী প্রসন্নকুমার ঘোষের সহযোগিতায় ‘বিদ্যাদর্শন’ নামে একখানি মাসিক পত্র প্রকাশ করেন। ১৮৪২ খ্রীষ্টাব্দের জুন মাসে (আষাঢ়, ১৭৬৪ শক) ইহার প্রথম সংখ্যা প্রকাশিত হয়। এই পত্রের প্রথম সংখ্যায় পত্র-প্রচারের উদ্দেশ্য সম্বন্ধে এইরূপ লিখিত হইয়াছে :—

যখন যে জাতির মধ্যে সভ্যতা প্রবেশ করে, তাহার পূর্বেই এই প্রকার প্রকাশ্য পত্রের স্থষ্টি হইয়া বিদ্যার পথমুক্ত হইতে থাকে। এই পরম প্রিয়কর নিয়মের পশ্চাদ্বর্তি হইয়া আমরাও বঙ্গদেশের মৃতপ্রায় ভাষার পুনরুদ্ধীপনে যত্ত্ব করিতে অভিলাষ করিয়াছি, কিন্তু পাঠক গণকে কি প্রকারে তুষ্ট করিতে চেষ্টা করিব এই চিন্তা এইক্ষণে কেবল সংশয়ে পরিপূর্ণ রহিল, যেহেতুক আমাদিগের এবশ্বকার উদ্ঘোগের গ্রাম্য এতদেশে পূর্বে একরূপ কোন কল্পনার স্থষ্টি হয় নাই, যে তাহার অনুগামি হইয়া আমরাও আমারদিগের অভিপ্রেত ব্যাপারে তত্ত্বাল্য রচনাদি করিতে উদ্দত হই, স্বতরাং এপ্রকার নৃতন বস্ত্রে আমরা অতিশয় ভীতচিন্তে অগ্রসর হইলাম, এবং সংশয়াপন্ন হইয়া বিদ্যার্থিগণকে এই পথকে অবলম্বন করিতে নিম্নৰূপ করিতেছি।

* * *

সম্প্রতি এই পত্রের বিশেষ তাৎপর্য ব্যক্ত করিবার জন্য ইহার সজ্ঞেপ বিবরণ নিম্নদেশে প্রকাশ করিতেছি। এতৎ পত্রে এমত সকল বিষয়ের আলোচনা হইবেক, যদ্বারা বঙ্গভাষায় লিপি বিদ্যার বর্তমান রৌতি উত্তম হইয়া সহজে ভাব প্রকাশের উপায় হইতে পারে। যত্পূর্বক

নীতি, ও ইতিহাস, এবং বিজ্ঞান প্রভৃতি বহুবিদ্যার বৃক্ষ নিমিত্ত নানা প্রকার গ্রন্থের অনুবাদ করা যাইবেক, এবং দেশীয় কুরীতির প্রতি বহুবিধ যুক্তি, ও প্রমাণ দর্শাইয়া তাহার নিবৃত্তির চেষ্টা হইবেক। তঙ্গিম রূপকাদিলিখনে এক২ প্রকার নৃতন নিয়ম প্রস্তুত করা যাইবেক।

এইক্ষণে কবিতার বীতি আমাবদিগের ভাষায় উত্তম নাই, অতএব তাহার প্রতি অধিক যত্ন করা অত্যন্ত প্রয়োজন বোধে সর্বদাই সাধারণ লেখকদিগকে তর্কদ্বারা সাবধান করিব, এবং উত্তম২ কবিতা যিনি লিখিয়া প্রেরণ করিবেন, তাহা অবশ্য আমাবদিগের বিচারের সহিত প্রকাশ করিতে কৃটি করিব না।

‘বিদ্যাদর্শন’ মাত্র ছয় সংখ্যা বাহির হইয়াছিল।

‘তত্ত্ববোধিনী পত্রিকা’

তত্ত্ববোধিনী সভা প্রতিষ্ঠিত হইবার কিছু দিন পরে দেবেন্দ্রনাথ সভার একখানি মুখ্যপত্র প্রচারের প্রয়োজন অনুভব করিলেন।

কোন ব্যক্তিকে ইহার সম্পাদকতার ভার অর্পণ করা যায় এই গুরুতর বিষয়টি সভার বিবেচ্য হইলে অবশ্যে স্থিরীকৃত হইল যে, প্রার্থিগণ “বেদান্ত ধর্মানুযায়ী সন্ন্যাস ধর্মের এবং সন্ন্যাসীদিগের প্রশংসাবাদ” এই বিষয়টি অবলম্বন পূর্বক এক একটি প্রবন্ধ লিখিয়া শ্রীদেবেন্দ্রনাথ ঠাকুর মহোদয়ের নিকট প্রেরণ করিবেন। যাঁর প্রবন্ধ সর্বোৎকৃষ্ট হইবে তিনিই সম্পাদকের পদে অভিষিক্ত হইবেন। ভবানী চরণ সেন অক্ষয়কুমার দত্ত প্রভৃতি কৃতবিদ্য ব্যক্তিগণের মধ্যে ইহার প্রতিযোগিতা হয়। অক্ষয় বাবুর প্রবন্ধটি সর্বোৎকৃষ্ট বলিয়া বিবেচিত হইলে, ইনি ৩০ টাকা বেতনে নিযুক্ত হন। তখন এই পদ ‘গ্রন্থ-সম্পাদকতা’ বলিয়া অভিহিত ছিল। ইহাকে সভারও কোন কার্য্য করিতে হইত।

এতভিন্ন, উভিদাদি বিজ্ঞান বিষয়ে উপদেশ পাইবার জন্য মেডিকেল কলেজে গমন করিতেন।—‘অক্ষয়-চরিত’, পৃ. ১৮-১৯।

১৬ আগস্ট ১৮৪৩ তারিখে ‘তত্ত্ববোধিনী পত্রিকা’ সর্বপ্রথম প্রকাশিত হয়। এই পত্রিকা প্রকাশ প্রসঙ্গে মহর্ষি দেবেন্দ্রনাথ তাহার ‘আত্মজীবনী’তে যাহা লিখিয়া গিয়াছেন, তাহাও নিম্নে উক্ত হইলঃ—

...একটি যন্ত্রালয়, একখানি পত্রিকা, অতি আবশ্যক হইল।

আমি ভাবিলাম, তত্ত্ববোধিনী সভার অনেক সভ্য কার্য্যস্থলে পরম্পর বিচ্ছিন্নভাবে আছেন। তাহারা সভার কোন সংবাদই পান না, অনেক সময় উপস্থিত হইতেও পারেন না। সভায় কি হয়, অনেকেই তাহা অবগত নহেন। বিশেষতঃ ব্রাহ্মসমাজে বিদ্যাবাগীশের ব্যাখ্যান অনেকেই শুনিতে পান না, তাহার প্রচার হওয়া আবশ্যক। আর, রামমোহন রায় জীবদ্ধশায় ব্রহ্মজ্ঞান বিস্তার উদ্দেশে যে সকল গ্রন্থ প্রণয়ন করেন, তাহারও প্রচার আবশ্যক। এতদ্যতীত, যে সকল বিষয়ে লোকের জ্ঞান বৃদ্ধি ও চরিত্র শোধনের সহায়তা করিতে পারে, এমন সকল বিষয়ও প্রকাশ হওয়া আবশ্যক। আমি এইরূপ চিন্তা করিয়া ১৭৬৫ শকে তত্ত্ববোধিনী পত্রিকা প্রচারের সংকল্প করি। পত্রিকার একজন সম্পাদক নিয়োগ আবশ্যক। সভ্যদিগের মধ্যে অনেকেরই রচনা পরীক্ষা করিলাম। কিন্তু অক্ষয়কুমার দত্তের রচনা দেখিয়া আমি তাহাকে মনোনীত করিলাম। তাহার এই রচনাতে গুণ ও দোষ দুইই প্রত্যক্ষ করিয়াছিলাম। গুণের কথা এই যে, তাহার রচনা অতিশয় স্বদয়গ্রাহী ও মধুর। আর দোষ এই যে, ইহাতে তিনি জটা-জুট-মণ্ডিত ভস্মাচ্ছাদিত-দেহ তরুতলবাসী সন্ধ্যাসীর প্রশংসা করিয়াছিলেন। কিন্তু চিহ্নধারী বহিঃসন্ধ্যাস আমার মতবিরুদ্ধ। আমি মনে করিলাম, যদি মতামতের জন্য নিজে সতর্ক থাকি, তাহা হইলে ইহার দ্বারা অবশ্যই পত্রিকা সম্পাদন করিতে পারিব। ফলতঃ তাহাই হইল। আমি অধিক বেতন দিয়া অক্ষয় বাবুকে গ্ৰ

কার্যে নিযুক্ত করিলাম।* তিনি যাহা লিখিতেন তাহাতে আমার মতবিরুদ্ধ কথা কাটিয়া দিতাম এবং আমার মতে তাহাকে আনিবার জগ্ন চেষ্টা করিতাম। কিন্তু তাহা আমার পক্ষে বড় সহজ ব্যাপার ছিল না। আমি কোথায়, আর তিনি কোথায়! আমি খুঁজিতেছি ঈশ্বরের সহিত আমার কি সম্বন্ধ, আর তিনি খুঁজিতেছেন, বাহু বস্তুর সহিত মানবপ্রকৃতির কি সম্বন্ধ। আকাশ পাতাল প্রভেদ। ফলতঃ আমি তাহার গ্রাম লোককে পাইয়া তত্ত্ববোধিনী পত্রিকার আশানুরূপ উন্নতি করি। অমন রচনার সৌষ্ঠব তৎকালে অতি অল্প লোকেরই দেখিতাম। তখন কেবল কয়েক থানা সংবাদপত্রই ছিল। তাহাতে লোকহিতকর জ্ঞানগর্ত কোন প্রবন্ধই প্রকাশ হইত না। বঙ্গদেশে তত্ত্ববোধিনী পত্রিকা সর্বপ্রথমে সেই অভাব পূরণ করে। বেদ বেদান্ত ও পরব্রহ্মের উপাসনা প্রচার করা আমার যে মুখ্য সংকল্প ছিল তাহা এই পত্রিকা হওয়াতে সুসিদ্ধ হইল।

‘তত্ত্ববোধিনী পত্রিকা’ প্রচারের কথা পূর্বেই বলা হইয়াছে।

কিন্তু অক্ষয় বাবুর চেষ্টায় ইহাতে ধর্ম বিষয় ব্যতীত, সাহিত্য, বিজ্ঞান পুরাতত্ত্বাদি উৎকৃষ্ট উৎকৃষ্ট বিষয়গুলি আলোচিত হইতে আবশ্য হয়। ইহা পূর্বে কিরণে সম্পাদিত হইত, তদ্বিষয়ে এ স্থলে কিছু উল্লেখ করা আবশ্যিক হইতেছে। মহানুভব দেবেন্দ্রনাথ ঠাকুর এসিয়াটিক সোসাইটি কর্তৃক প্রদর্শিত পথ অবলম্বন করিয়া পেপার কমিটী (Paper Committee) নামে একটি প্রবন্ধ নির্বাচনী সভা সংস্থাপন করেন। কমিটীর পাঁচজনের অধিক সভ্য (গ্রন্থাধ্যক্ষ) সংখ্যা ছিল না; অন্তর্ভুক্ত সভা সমিতির যেকোন নিয়ম ইহারও সেইরূপ ছিল—একজন গ্রন্থাধ্যক্ষ

* প্রথমে তিনি ৩০ বেতনে নিযুক্ত হন। এই বেতন বৃদ্ধি পাইয়া ৪৫ ও শেষে ৬০ টাকা হয়।

অবসর গ্রহণ করিলে অপর একজন মনোনীত হইয়া তাহার স্থান পূর্ণ করিতেন। পণ্ডিতবর শ্রীঙ্গুরুচন্দ্র বিজ্ঞাসাগর শ্রীযুক্ত বাবু (এক্ষণে ডাক্তার) রাজেন্দ্রলাল মিত্র শ্রীযুক্ত বাবু (এক্ষণে মহর্ষি) দেবেন্দ্রনাথ ঠাকুর শ্রীযুক্ত বাবু রাজনারায়ণ বসু শ্রীযুক্ত বাবু আনন্দকৃষ্ণ বসু ৷ শ্রীধর শ্বামুরত্ন ৷ আনন্দচন্দ্র বেদান্তবাগীশ ৷ প্রসন্নকুমার সর্বাধিকারী ৷ বাধাপ্রসাদ রায় ৷ শ্বামাচরণ মুখোপাধ্যায় প্রভৃতি মহোদয়গণ ইহার সভ্য ছিলেন। সভার নিয়ম ছিল যে, কি গ্রন্থ-সম্পাদক, কি গ্রন্থাধ্যক্ষ কি অপর কোনও ব্যক্তি কেহ যদৃপি পত্রিকায় প্রকটিত করিবার অভিলাষে কোনও প্রবন্ধ রচনা কবেন, প্রবন্ধ নির্বাচনী-সভার অধিকাংশ সভ্য কর্তৃক অগ্রে তাহা মনোনীত ও আবশ্যক হইলে পরিবর্ত্তিত ও সংশোধিত হইলে তবে পত্রিকাস্থ হইবে।.....১৭৭০ শকের ২৩এ শ্রাবণ তারিখের অধ্যক্ষ সভার অধিবেশনে তিনি [অক্ষয়কুমার] পেপার কমিটীর সভ্যশ্রেণী ভূক্ত হন। (‘অক্ষয়-চরিত’, পৃ. ১৯-২১)

অক্ষয়কুমার বাবুর বৎসর, ঈং ১৮৪৩—১৮৫৫, দক্ষতার সহিত ‘তত্ত্ববোধিনী পত্রিকা’ সম্পাদন করিয়াছিলেন। তাহার লিখিত বচ্ছ রচনা এই পত্রিকার পৃষ্ঠা অলঙ্কৃত করিয়া আছে। মহর্ষি দেবেন্দ্রনাথ লিখিয়াছেন :—

তত্ত্ববোধিনী পত্রিকার এক সময়ে ৭০০ জন গ্রাহক ছিল ; তাহা কেবল এক অক্ষয় বাবুর দ্বারা। অক্ষয়কুমার দক্ষ যদি সে সময় পত্রিকা সম্পাদন না করিতেন, তাহা হইলে তত্ত্ববোধিনী পত্রিকার একপ উন্নতি কথনই হইতে পারিত না।—‘আঙ্ক-সমাজের পঞ্চবিংশতি বৎসরের পরীক্ষিত বৃত্তান্ত’, পৃ. ২১।

অবশ্য ‘তত্ত্ববোধিনী পত্রিকা’র প্রতিষ্ঠা প্রসঙ্গে সম্পাদক ছাড়া প্রবন্ধ-নির্বাচনী সভার কথা ও স্মরণীয়। ১৭৮১ শকে তত্ত্ববোধিনী সভার সঙ্গে সঙ্গে এই সভাও বিলুপ্ত হয়।

কলিকাতা নর্মাল স্কুলের প্রধান শিক্ষক

১৮৫৫ সনের প্রথমার্দ্ধে ঈশ্বরচন্দ্র বিহাসাগর নদীয়া, বর্দ্ধমান, হগলী ও মেদিনীপুরে অনেকগুলি মডেল বা আদর্শ বঙ্গবিদ্যালয় প্রতিষ্ঠার, আয়োজন সম্পূর্ণ করেন। তিনি বাংলা বিদ্যালয়গুলির শিক্ষক-নির্বাচনে মনোধোগ দিলেন; কারণ, তিনি জানিতেন, এই সব শিক্ষকের যথোপযুক্তিপূর্ণ জ্ঞানের উপরই সরকারী শিক্ষা-ব্যবস্থার সাফল্য নির্ভর করিতেছে। পরীক্ষায় দেখা গেল, শিক্ষক-পদপ্রাপ্তদের মধ্যে অতি অল্প লোকই সরকারী মডেল স্কুলগুলির ভার লইতে সমর্থ হইবে। এমনি করিয়া শিক্ষকদের শিক্ষাদানের জন্য একটি নর্মাল স্কুলের প্রয়োজনীয়তা নিঃসন্দেহে প্রতিপাদিত হইল। এই সময় তিনি প্রস্তাবিত নর্মাল স্কুলের হেড মাস্টারের পদের উপযুক্ত একজন লোককেও পাইলেন, তিনি অক্ষয়কুমার দত্ত। “পীড়া ও অন্ত কোন কারণবশতঃ অক্ষয়বাবু তখন তত্ত্ববোধিনী পত্রিকা ও ব্রাহ্মসমাজের নিকট হইতে বিদ্যায় গ্রহণেচ্ছুক হন। এ অবস্থায় যখন বিদ্যাসাগর মহাশয় তাহাকে প্রধান শিক্ষকের পদ গ্রহণের কথা বলিলেন, তখন তিনি অত্যন্ত আহ্লাদের সহিত বলিলেন ‘তা হলে বাঁচি।’”—‘অক্ষয়-চরিত’, পৃ. ৩৭-৩৮।

‘তত্ত্ববোধিনী পত্রিকা’র সহিত সংশ্লিষ্ট থাকা কালে অক্ষয়চন্দ্র বিদ্যাসাগর মহাশয়ের সহিত পরিচিত হইয়াছিলেন। এমন কি, অক্ষয়-কুমারের সন্নির্বন্ধ অনুরোধে বিদ্যাসাগর মহাশয় তাহার অনেক রচনা ও সংবলে দেখিয়া দিয়াছেন।* অক্ষয়কুমার সম্বন্ধে বিদ্যাসাগরের উচ্চ

* রাজনান্নায়ণ বসু লিখিয়াছেন :—“অনেকে অবগত নহেন যে, দেবেন্দ্রনাথ ঠাকুর ও বিদ্যাসাগর মহাশয়ের নিকট অক্ষয়কুমার দত্ত কত উপকৃত আছেন। তাহারা তাহার জৈব প্রথম প্রধান বিজ্ঞ সংশোধন করিয়া দিতেন।”—‘বাঙালী ভাষা ও সাহিত্য বিষয়ক ‘বক্তা’, পৃ. ২৯।

ধারণাই ছিল। তিনি নর্মাল স্কুল প্রতিষ্ঠা সম্পর্কে অক্ষয়চন্দ্রকে স্বপারিশ করিয়া ২ জুলাই ১৮৫৫ তারিখে শিক্ষা-বিভাগের অধ্যক্ষকে এই পত্র লিখিলেন :—

I would propose that two masters, one at Rs. 150 and the other at Rs. 50 per month, be employed for the present to undertake the task of training up the teachers for our new vernacular school.

* * *

For the post of Head Master of the Normal classes, I would recommend Babu Akshoy Kumar Dutt, the well-known editor of the *Tatwabodhini Patrika*. He is one of the very few of the best Bengali writers of the time. His knowledge of the English language is very respectable and he is well informed in the elements of general knowledge, and well-acquainted with the art of teaching. On the whole, I do not think that we can secure the services of a better man for the post. For the second mastership, I would propose Pandit Madhusudan Bachaspati. He is a distinguished ex-student of the Sanskrit College, an able and elegant Bengali writer, well-acquainted with the art of teaching, and, in my opinion, in every respect qualified to fill the post for which he is recommended.

তাৎপর্য :—“তত্ত্ববোধিনী পত্রিকার সর্বজনবিদিত সম্পাদক বাবু অক্ষয়-কুমার দত্ত নর্মাল ক্লাসগুলির প্রধান শিক্ষক হন—ইহাই আমার অভিযন্ত। বর্তমানে প্রথম শ্রেণীর বাংলা লেখক অতি অল্পই আছেন; অক্ষয়কুমার সেই সর্বোৎকৃষ্ট লেখকদের অন্তর্ম। ইংরেজীতে তাঁহার বেশ জ্ঞান আছে, এবং সাধারণ জ্ঞানের প্রাথমিক তথ্যসমূহ-সম্বন্ধে তাঁহার অপেক্ষা যোগ্যতর লোক পাইবার সম্ভাবনা নাই।”

শিক্ষা-বিভাগের অধ্যক্ষ পত্রিতের প্রস্তাব অনুমোদন করিলেন। ১৭
জুলাই ১৮৫৫ তারিখ হইতে বিদ্যাসাগরের তত্ত্বাবধানে কলিকাতায়

৫৭ - ৩৪৭
 Acc 22280
 ৩। ১। ২। ২। ২। ০৬

একটি নর্মাল স্কুল খোলা হইল। স্বতন্ত্র বাড়ী না পাওয়ায় আপাততঃ নর্মাল স্কুল সকালবেলা দুই ঘণ্টার জন্য সংস্কৃত কলেজেই বসিতে লাগিল। স্কুলটি দুইটি শ্রেণীতে বিভক্ত ছিল; উচ্চ শ্রেণীর ভার—প্রধান শিক্ষক, অক্ষয়কুমার দত্তের উপর, এবং নিম্ন শ্রেণীর ভার ছিল—দ্বিতীয় শিক্ষক মধুসূদন বাচস্পতির উপর। অক্ষয়চন্দ্র ভূগোল প্রভৃতি বিষয়ে, এবং বাচস্পতি বাংলা ও সংস্কৃত শিক্ষা দিতেন।

কিন্তু অক্ষয়কুমার দীর্ঘকাল কলিকাতা নর্মাল স্কুলে শিক্ষকতা করিতে পারেন নাই। দারুণ শিরোরোগে তিনি ১৮৫৬ খ্রীষ্টাব্দের আগস্ট মাসে এক বৎসর, পরে ছয় মাস করিয়া দুই বার ছুটি লইতে বাধ্য হইয়াছিলেন। শেষে ১৮৫৮ খ্রীষ্টাব্দের আগস্ট মাসে তিনি পদত্যাগ করেন। তাঁহার স্থলে প্রতিনিধি হিসাবে সংস্কৃত কলেজের প্রাক্তন ছাত্র রামকমল ভট্টাচার্য (আচার্য কল্পকমলের অগ্রজ) কার্য করিয়াছিলেন; শেষে তিনিই স্থায়ী ভাবে নর্মাল স্কুলের হেড মাস্টার নিযুক্ত হন।

শেষ জীবন

অক্ষয়কুমার দুরারোগ্য শিরোরোগে অকর্মণ্য হইয়া পড়িলেন। চিকিৎসা, বায়ুপরিবর্তনাদি ব্যাপারে তাঁহার ব্যয় বৃদ্ধি হইল। এই সময় তত্ত্ববোধিনী সভা মাসিক বৃত্তি নির্ধারণ করিয়া তাঁহাকে সাংসারিক দৃশ্টিতে কর্তৃক অব্যাহতি দিয়াছিলেন। মহেন্দ্রনাথ বিষ্ণানিধি লিখিয়াছেন :—

দেশ-মাত্র পশ্চিতবর শ্রীযুক্ত ইশ্বরচন্দ্র বিহাসাগর মহাশয় এ বিষয়ের
জন্য বিশেষ উদ্যোগ পাইয়াছিলেন। তাঁহা কর্তৃক বিচিত্র সে বিষয়ের

বৃত্তান্ত ১৭৭৯ সতরশ উনআশী শকের (১২৬৪ সালের) কার্তিক মাসের
তত্ত্ববোধিনী পত্রিকার প্রকাশিত হয়।*

বৃত্তান্তটি উন্নত হইল :—

বিশেষ সত্ত্বার প্রস্তাব।

২৯ তার্দ—১৭৭৯

তত্ত্ববোধিনী পত্রিকা প্রচারিত হওয়াতে এতদেশীয় লোকদিগের
যে নানা গুরুতর উপকার লাভ হইয়াছে, ইহা বোধ বিশিষ্ট ব্যক্তিমাত্রেই
স্বীকার করিয়া থাকেন। আদ্যোপান্ত অনুধাবন করিয়া দেখিলে শ্রীযুক্ত
বাবু অক্ষয়কুমার দত্ত এই তত্ত্ববোধিনী পত্রিকা স্থষ্টির এক জন প্রধান
উদ্দোগী এবং এই মহোপকারিণী পত্রিকার অসাধারণ শ্রীবৃন্দি লাভের
অধিকারীয় কারণ বলিয়া বোধ হইবে। তাহারই যজ্ঞে ও পরিশ্রমে
তত্ত্ববোধিনী পত্রিকা সর্বত্র একপ আদরভাজন ও সর্বসাধারণের একপ
উপকার সাধন হইয়া উঠিয়াছে। বস্তুতঃ তিনি অন্যমনা ও অন্যকর্মা
হইয়া কেবল তত্ত্ববোধিনী পত্রিকার শ্রীবৃন্দি সম্পাদনেই নিয়ত নিবিষ্টচিন্ত
ছিলেন। তিনি এই পত্রিকার শ্রীবৃন্দি সাধনে কৃতসকল হইয়া অবিশ্রান্ত
অত্যুৎকৃষ্ট পরিশ্রম দ্বারা শরীর পাত করিয়াছেন, বলিলে বোধ হয়,
অত্যুক্তি দোষে দূষিত হইতে হয় না। তিনি যে অতি বিষম শিরোমোগে
আক্রান্ত হইয়া দীর্ঘকাল অশেষ ক্লেশ তোগ করিতেছেন, তাহা কেবল
এই অত্যুৎকৃষ্ট মানসিক পরিশ্রমের পরিণাম, তাহার সন্দেহ নাই। অতএব
যিনি তত্ত্ববোধিনী পত্রিকার নিমিত্ত শরীরপাত করিয়াছেন, সেই মহোদয়কে
সহস্র সাধুবাদ প্রদান করা ও তাহার প্রতি তথোচিত কৃতজ্ঞতা প্রদর্শন

* মহেন্দ্রনাথ বিহুনিধি: 'শ্রীযুক্ত বাবু অক্ষয়কুমার দত্তের জীবন-বৃত্তান্ত', (তার্দ ১২৯২ সাল), পৃ. ২৩৩।

- করা অত্যাবশ্রূত, না করিলে তত্ত্ববোধিনী সভার সভ্যদিগের কর্তব্যানুষ্ঠানের ব্যতিক্রম হয়।

দীর্ঘকাল দুরস্ত রোগে আক্রান্ত থাকাতে অক্ষয়কুমার বাবুর আয়ের সঙ্কোচ, ব্যয়ের বাহুল্য এবং তন্ত্রিকান অশেষ ক্লেশ ঘটিবার উপক্রম হইয়া উঠিয়াছে। এ সময় কিছু অর্থ সাহায্য করিতে পারিলে প্রকৃতক্রমে কৃতজ্ঞতা প্রদর্শন করা হয়, এই বিবেচনায় গত শ্রাবণ মাসের দ্বাদশ দিবসীয় বিশেষ সভায় শ্রীযুত বাবু কানাইলাল পাইন প্রস্তাব করেন, যে তত্ত্ববোধিনী সভা হইতে কিছুকালেব জন্য অক্ষয়কুমার বাবুকে সাহায্য প্রদান করা যায়। তদমুসারে অন্ত সমাগত সভ্যেরা নির্দ্ধারিত করিলেন, অক্ষয়কুমার বাবু যত দিন পর্যন্ত সম্যক্ সুস্থ ও স্বচ্ছন্দ শব্দীর হইয়া পুনরায় পরিশ্রম ক্ষম না হন, তত দিন তিনি সভা হইতে আগামী আশ্বিন মাস অবধি পঞ্চবিংশতি মুদ্রা মাসিক বৃত্তি পাইবেন। আর ইহাও নির্দ্ধারিত হইল যে এই প্রতিজ্ঞার প্রতিলিপি অক্ষয়কুমার বাবুর নিকট প্রেরিত হয় এবং সর্বসাধারণের গোচরার্থে তত্ত্ববোধিনী পত্রিকাতেও অবিকল মুদ্রিত হয়।—‘তত্ত্ববোধিনী পত্রিকা,’ কার্তিক ১৭৭৯ শক, পৃ. ৮৪ কিন্তু বেশী দিন অক্ষয়কুমারকে এই বৃত্তি গ্রহণ করিতে হয় নাই। ইতিমধ্যে তাহার পুস্তকগুলির আয় ষথেষ্ট বাড়িয়া গিয়া তাহার অবস্থা অনেকটা সচ্ছল হইয়াছিল।

অক্ষয়কুমার বালিগ্রামে গঙ্গাতীরে প্রায় এক বিঘা জমির উপর উত্থান-সমেত একটি গৃহ নির্মাণ করেন। উত্থানটির নাম রাখেন—‘শোভনোঢ়ান’। বিচিত্র বৃক্ষ লতা গুল্ম উত্থানের শোভা বৃক্ষি করিয়াছিল। একখানি পত্রে তিনি রাজনারায়ণ বস্তুকে লেখেনঃ—“আমার আশ্রম-বৃক্ষগুলি বড়ই ভাল আছে। তাহাদিগকে সতত দেখিয়া ও লাগন পালন করিয়া সমধিক সুখী হই।” শিরোরোগে কাতর হইলে এই উত্থানে বিচরণ করিয়া অক্ষয়কুমার অনেকটা উপশম বোধ করিতেন।

৩। বৎসর দুর্স্ত রোগে ভুগিবার পর ২৮ মে ১৮৮৬ (১৪ জ্যৈষ্ঠ ১২৯৩, রাত্রি অহুমান ৩-১৫ মিনিট) তারিখে তাঁহার সকল জ্ঞান-স্মরণার অবসান হয় । তাঁহার মৃত্যুতে ‘সোমপ্রকাশ’ লিখিয়াছিলেন :—

এমন একটী অমূল্য রত্ন হারাইয়া আমরা সকলেই তাঁহার জগতে কান্দিতেছি, বঙ্গবাসী মাত্রেই তাঁহার শোকে ব্রিয়মাণ । আমরা প্রস্তাব করি কলিকাতা সেনেট হাউসে অক্ষয়কুমার দত্তের একটী প্রতিমূর্তি স্থাপন করিবার জগতে দেশের লোক সফল হউন ।

রচনাবলী

অক্ষয়কুমারের নিকট বাংলা ভাষা অশেষ ঝণী । তিনি জ্ঞান-বিজ্ঞানের কথা প্রাঞ্চল অথচ হৃদয়গ্রাহী ভাষায় লিখিয়া গিয়াছেন । প্রকাশকাল-সমেত তাঁহার রচিত পুস্তকগুলির একটি তালিকা দিতেছি ।

১। অনঙ্গমোহন । ইং ১৮৩৪ (?)

নকুড়চন্দ্র বিশ্বাস ‘অক্ষয়-চরিতে’ (পৃ. ১৪) এই পুস্তকখানি সম্বক্ষে লিখিয়াছেন :—

ন্যূনাধিক চতুর্দশ বৎসর বয়ঃক্রম কালে বাবু অক্ষয়কুমার দত্ত “অনঙ্গমোহন” নামে একখানি পদ্ধতির গ্রন্থ রচনা করেন । ইহা বর্তমান বটতলার গ্রন্থাবলি হইতে কোনও অংশে উৎকৃষ্ট নহে । ইহা “কামিনী কুমারের” সমতুল্য—তজ্জপ রুচির পরিচায়ক । গ্রন্থকারের আস্তীয়বর্গের নিকট ইহার একথণ ছিল, সম্পত্তি নষ্ট হইয়াছে ।

২। ভূগোল । ইং ১৮৪১ । পৃ. ৭৫ ।

ভূগোল । / তত্ত্ববোধিনী সভার অধ্যক্ষদিগের অনুমত্যমুসারে / ভৎসভ্য শ্রী
অক্ষয়কুমার দস্ত কর্তৃক / প্রস্তুত হইয়া / তত্ত্ববোধিনী সভা হইতে মুদ্রাঙ্কিত হইল । /
কলিকাতা । / শকা�্দঃ ১৭৬৩ । /

“ভূমিকা”য় গ্রন্থকার লিখিতেছেন :—

ইদানীং দেশহিতৈষি বিজোৎসাহি মহাশয়দিগের দৃঢ় উদ্যোগে
স্থানে২ যে প্রকার প্রকৃষ্ট পদ্ধতি কৰ্মে বঙ্গভাষার অনুশীলন হইতেছে,
তাহাতে ভবিষ্যতে এ দেশীয় ব্যক্তি গণের বিদ্যা বৃদ্ধির উন্নতি হওনৰ
বিলক্ষণ সন্তাবনা আছে, কিন্তু এ ভাষায় এ প্রকার প্রচুর গ্রন্থ দৃষ্ট হয় না
যে তদ্বারা বালক দিগকে সুচারুরূপে শিক্ষা প্রদান করা যায়। এই
সুযোগযুক্ত সময়ে যদি এ অকিঞ্চন হইতে কিঞ্চিৎ দেশের উপকার সন্তবে
এই মানস করিয়া চন্দ্ৰস্থালোভি উদ্বাল বামনের গ্রাম দীৰ্ঘ আশায় আসক্ত
হইয়া বহুক্লেশে বহু ইংৰাজি গ্রন্থ হইতে উদ্বৃত্ত করিয়া বালক দিগেৰ
বোধগম্য অথচ স্বশিক্ষাযোগ্য এই ভূগোল পুস্তক প্রস্তুত করিয়াছি ।...

এই পুস্তক প্রস্তুত হইয়া উপায়াভাবে কিয়ৎকাল অপ্রকটিত ছিল,
পরে তত্ত্ববোধিনী সভা বিশেষরূপে স্বপ্রসন্না হইয়া স্বীয় বিভিন্ন দ্বাৰা
ইহাকে প্রকাশিত কৰত যে প্রকার কৃপা বিতরণ কৰিলেন, তাহাতে
সাহস পূৰ্বক কৰিতে পারি, যে উক্ত সভাৰ এৱপ অনুগ্রহ না হইলে এই
পুস্তক সাধাৰণ সমীপে কদাচ এৱপে উদিত হইত না, অতএব চিন্তমধ্যে
এই অতুল উপকারকে যাবজ্জীবন জাগৰুক রাখিয়া তাহার কৃপা মূল্যে
বিকৃত থাকিলাম ।

এই দুপ্রাপ্য পুস্তকখানি বঙ্গীয়-সাহিত্য-পৰিষদেৰ গ্রন্থাগারে
আছে ।

৩। শ্রীযুক্ত ডেবিড হেয়াৰ সাহেবেৱ নাম স্মৰণার্থ তৃতীয়
সাবৎসৱিক সভাৰ বক্তৃতা । ইং ১৮৪৫। পৃ. ৮।

A / DISCOURSE read at the Third Hare Anniversary Meet-
ing, / by / Baboo Ukhoy Coomar Duttu. Calcutta. Printed at
the Tuttuboadhinee Press. / 1845. /

এই পুস্তিকার গোড়ার ৪ পৃষ্ঠায় ইংরেজীতে তৃতীয় হেয়ার-সাম্বৎসরিক সভার কার্যবিবরণ আছে। পরবর্তী ১-৮ পৃষ্ঠায় দক্ষ-মহাশয়ের বক্তৃতাটি মুদ্রিত হইয়াছে। এই পুস্তিকাটি অতীব দুর্প্রাপ্য; এই কারণে আমরা নিম্নে বক্তৃতাটি হবহু উন্নত করিলাম।—

সভা আরম্ভ হইলে শ্রীযুক্ত বাবু অক্ষয়কুমার দক্ষ বক্তৃতা করিলেন, যে সপ্তাহ মেঘাচ্ছন্ন হইয়া পরে সূর্য প্রকাশ হইলে চিন্ত কি প্রকার প্রফুল্ল হয়! গ্রীষ্মেতে গাত্র দাহ হইয়া পরে মন্দ মন্দ শীতল বায়ুর হিল্লোলে শরীর স্থিতি হইতে আরম্ভ হইলে অন্তঃকরণে কি প্রকার সন্তোষের উদয় হয়! সেই রূপ হিন্দুদিগের মলিন চরিত্রকে ক্রমশঃ উৎকৃষ্ট দেখিয়া চিন্ত আনন্দে পরিপূর্ণ হইতেছে। আমরা কত কাল আক্ষেপ করিতেছি, যে স্বদেশের মঙ্গল চেষ্টা করা যে মনুষ্যের প্রধান ধর্ম তাহা ভারতবর্ষের লোকদিগের চিন্ত হইতে লুপ্ত হইয়াছে—অনুৎসাহ, অল্প প্রতিজ্ঞা, দ্বেষ, কলহ, বিচ্ছেদ আমারদিগের মহাশক্ত হইয়াছে। আমরা কত কাল আক্ষেপ করিতেছি, যে আমারদিগের জ্ঞানের প্রতি সমাদৃত নাই, সত্যের প্রতি প্রীতি নাই, কোন কর্ষের উত্তম নাই, এবং যতক্ষণ কোন বিপদ্ম মন্তকোপরি পতিত না হয় তত ক্ষণ তাহার প্রতি দৃক্পাতও হয় না। আমরা কত কাল আক্ষেপ করিতেছি, যে এ দেশীয় লোক ইতর জন্মের স্থায় আহার বিহারাদি অলীক আমোদকেই জীবনের মূলাধার কার্য বোধ করেন, এ প্রযুক্ত কিঞ্চিৎ কালের ঐন্দ্ৰিয় সুখ নিমিত্তে রাশি রাশি ধন সমর্পণ করেন; কিন্তু ইহা তাহারা বিবেচনা করেন না, যে জগদীশ্বর কি নিমিত্তে তাহারদিগকে ইতর পক্ষে অপেক্ষা শ্রেষ্ঠ করিয়া বুদ্ধির সহিত ভূষিত করিয়াছেন? তাহার নিয়মানুসারে উপযুক্ত রূপে ক্ষুধা শান্তি না করিলে যে প্রকার শরীরের স্থূলতা ভঙ্গ হয়, উপযুক্ত রূপে বুদ্ধির আলোচনা না করিলে সেইরূপ মূর্খতা ও কদাচার রূপ মানসিক রোগ উপস্থিত হয়, এই সত্যকে অজ্ঞাত হইয়া তাহারা জ্ঞানের অবহেলা

সর্বদা করিয়া আসিতেছেন। পুত্রের বিবাহেপলক্ষে কত ব্যক্তি লক্ষ্টাকা পর্যন্ত নিঃক্ষেপ করিয়াছেন, কিন্তু সেই পুত্রের বিদ্যা উপার্জন নিমিত্তে মাসে পাঁচ টাকাও ব্যয় করিতে কৃষ্ণিত হইয়াছেন। এক রজনীর অপবিত্র আমোদ উপলক্ষে যাহারা সহস্র টাকা অনায়াসে ব্যয় করিয়াছেন, তাহারা কোন বিদ্যালয়ের সাহায্য জন্য দশ টাকা দান করিতেও বিমুখ হইয়াছেন। এই প্রকারে এ দেশস্থ লোকের মনুষ্যত্বের চিহ্ন প্রায় ছিল না। কিন্তু এক্ষণ অবস্থা কত কাল স্থায়ী হইতে পারে? বায়ু প্রবাহিত না হইয়া কতক্ষণ স্থির থাকিতে পারে? কাল ক্রমে লোকের মনঃ ক্ষেত্র পরিস্কৃত হইতে লাগিল, এবং উৎসাহের বীজ অঙ্কুরিত হইতে আরুক হইল। পন্থের প্রাণ যিনি অনুভব করিয়াছেন, তিনি বন্ধুদিগকে সেই প্রাণ স্থুল প্রদান করিবার জন্য অবশ্য যত্নবান् হয়েন। যাহারা জ্ঞানের স্বাদু প্রাপ্ত হইলেন, তাহারা সেই আস্থাদন স্থুল অনুদিগকে দিবার জন্য উৎসাহি হইলেন। কিন্তু কিয়ৎ কাল সে উৎসাহ কেবল মৌখিক উৎসাহ মাত্র হইল—তদনুসারে কার্য্য হওয়া দুষ্কর হইল। আমরা বিদ্যা বিষয়ে, লোকের উৎসাহ বিষয়ে, রাজনিয়ম বিষয়ে কত আলোচনা করিয়াছি, ধর্মাধর্মের বিষয়ে কত চর্চা করিয়াছি, এবং নানা প্রকারে স্বদেশের মঙ্গলোন্নতি জন্য কত আন্দোলন ও কত প্রস্তাব উৎপন্ন করিয়াছি। কিন্তু সে কেবল আন্দোলন মাত্র হইয়াছে। দুই বিদ্বান্ ব্যক্তির পরম্পর সাক্ষাৎ হইলে স্বদেশের মঙ্গল তাহারদিগের আলাপের প্রথম স্মৃত হইত, কিন্তু পৃথক্ হইলে চিত্তপটে সে সমুদয়ের চিহ্নমাত্রও থাকিত না। কত ব্যক্তির অস্তঃকরণে উৎসাহের শিখা তৃণ সংযুক্ত অগ্নির শ্বায় একেবারে জাঙ্গল্যমান হইয়াও পরক্ষণে নির্বাণ হইয়াছে। সাধারণের হিতজনক কত কর্মের সূচনা হইয়াছিল, সে সকল কোন্ কালে লুপ্ত হইয়াছে। এক দিবস যাহার অঙ্কুর দৃষ্টি করিয়াছি, পর দিবসে তাহাকে উচ্ছিন্ন দেখিতে হইয়াছে। এই ক্ষণে স্বদেশহিতৈষি মহাত্মাদিগের কত যত্ন বিফল

ହଇଯାଛେ । କିନ୍ତୁ କତ ଦିନ ବିନା ବର୍ଷଣେ ମେଘ ଗର୍ଜନ ହଇତେ ପାରେ ? ନିଜ୍ଞା ହଇତେ ଜାଗ୍ରତ୍ତ ହଇଯା ମନୁଷ୍ୟ କତ କ୍ଷଣ ଶୟାଗତ ରହିତେ ପାରେ ? କେବଳ ଇଚ୍ଛାତେ ଲୋକ ତୃପ୍ତ ଥାକିତେ ପାରିଲେକ ନା । ଅଭିଲାଷ କାର୍ଯ୍ୟରେ ପରିଣତ ହଇତେ ଲାଗିଲ, ଧର୍ମର ଉନ୍ନତି ଜଗ୍ନ ତତ୍ତ୍ଵବୋଧିନୀ ସଭା ପ୍ରତିଷ୍ଠିତା ହଇଲ, ଏବଂ ଏ ଦେଶେର ସୁଖ ସ୍ଵଚ୍ଛନ୍ଦତାର ବୁନ୍ଦି ନିମିତ୍ତେ ବେଙ୍ଗାଳ ବ୍ରିଟିଶ ଇଣ୍ଡିଆ ସୋସାଇଟି ସଂସ୍ଥାପିତ ହଇଲ । ଏହି ଉଭୟ ସଭାର ସଭ୍ୟରା ପ୍ରତିଜ୍ଞାର ସହିତ ତାହାରଦିଗେର କର୍ମ ସମ୍ପନ୍ନ କରିତେଛେ । ବିଶେଷତ : ଏ ଦେଶୀୟ ଲୋକେବ ଉତ୍ସାହ ପ୍ରବାହ ତଥନ ପ୍ରବଳ ଦେଖି, ଏବଂ ତଥନ ଅନ୍ତଃକ୍ରମ ସାହସେ ପରିପୂର୍ଣ୍ଣ ହୟ, ସଥନ ଏହି ସମ୍ପ୍ରତିକାର ଘଟନାକେ ଶ୍ଵରଣ କରି—ସଥନ ଶ୍ଵରଣ କରି, ଯେ ଦରିଜ ହିନ୍ଦୁବାଲକଦିଗକେ ବିଦ୍ଯା ଦାନେର ନିମିତ୍ତେ ନଗରଙ୍ଗ ସକଳ ଲୋକ ଉଦୟୋଗି ହଇଯାଛେ । ଅଗ୍ନ ଜାତି ମଧ୍ୟେ ଯଦିଓ ଏ ଅତି ସାମାନ୍ୟ କାର୍ଯ୍ୟ, କିନ୍ତୁ ଭାବତରସ ପରାଧୀନ ହଇଲେ ଏ ଦେଶୀୟ ଲୋକେର ମଧ୍ୟେ ଏମତ ଶୁଭ ଶୂଚକ ଘଟନା କଦାପି ହୟ ନାହିଁ—ଏମତ ଏକାକ୍ରମ କଦାପି ବନ୍ଦ ହୟ ନାହିଁ—ଏବଂ ଏହି ଉପଲକ୍ଷେ ସଭାତେ ଯେ ସମାରୋହ ହଇଯାଇଲ ଏଦେଶେର କୋନ ସାଧାରଣ ମଙ୍ଗଳଜନକ କର୍ଷେ ଏ ପ୍ରକାର ବହୁ ବ୍ୟକ୍ତି ଏକ ସ୍ଥାନେ ଏକକାଳେ କଦାପି ଏକତ୍ର ହୟ ନାହିଁ । ଯେ ସ୍ଥାନେ ଦଶ ଜନକେ ଏକତ୍ର ଦେଖି ସେଇ ସ୍ଥାନେଇ ଏହି ଭାବି ହିନ୍ଦୁ ହିତାର୍ଥ ବିଦ୍ୟାଲୟେର ଉନ୍ନତି ବିଷୟେ ଆଲୋଚନା କରିତେ ପ୍ରୀତି ହୟ, ଯେହେତୁ ସକଳ ମଙ୍ଗଲେର ଆକର ଯେ ଜ୍ଞାନ କେବଳ ତାହାଇ ଯେ ଇହାର ଦ୍ୱାରା ବିଜ୍ଞାନ ହଇବାର ସନ୍ତ୍ଵାନା ଏମତ ନହେ, ଏହି ଘଟନାତେ ଭାରତବରସର ସୌଭାଗ୍ୟ ଦିବସେର ଉଷାକାଳ ପ୍ରାପ୍ତ ଦେଖିତେଛି । ଅନୁୟସାହ, ଆଲମ୍ଭ୍ୟ, ଅନୁଦୟୋଗ ପ୍ରଭୃତି ଯେ ଆମାରଦିଗେର ଅପବାଦ ତାହା ମୋଚନେର ଉପକ୍ରମ ଦେଖିତେଛି, ଏବଂ ଯେ ଐକ୍ୟର ଅଭାବ ପ୍ରୟୁକ୍ତ ଏ ଦେଶେର ସକଳ ଶୁଭ କର୍ଷେର ଶୂଚନା ବିଫଳ ହଇଯାଛେ, ଏ ବିଷୟେ ସେଇ ଏକ ସଂସ୍ଥାପନେର ସନ୍ତ୍ଵାନା ଦେଖିଯା ଆନନ୍ଦିତ ହଇତେଛି । ଧନି ଦରିଜ, ବିଦ୍ୟାନ୍ ଅନ୍ତଃ, ବୃଦ୍ଧ ବାଲକ, ବ୍ରାହ୍ମ ପୋତୁଲିକ ସକଳ ପ୍ରକାର ଭିନ୍ନ ବର୍ଣ୍ଣଙ୍କ, ଭିନ୍ନ ମତସ୍ତ, ଭିନ୍ନ ଧର୍ମବଲଞ୍ଛି ବ୍ୟକ୍ତି ଏ ବିଷୟେ ଏକତ୍ର

হইয়াছেন। এই ঐক্য সংস্থায়ী হইলে কোন্ দুঃখ মোচন না হইতে পারে? ঐক্য দ্বারা কত গভীর অরণ্য উচ্ছিল্প হইয়াছে, রাজ্য সকল স্থাপিত হইয়াছে, নগর সমূহ নির্মিত হইয়াছে, এবং সভ্যতার আলোক প্রদীপ্ত হইয়াছে। এই ঐক্য সংস্থায়ী হইলে আমরা কেবল এক পাঠশালা প্রতিষ্ঠা করিয়াই কি তৃপ্তি থাকিব?—আমারদিগের আশা কত দীর্ঘ হইতেছে—আমারদিগের ভরসা কত বৃদ্ধি হইতেছে। এই ঐক্য দ্বারা উৎসাহের শ্রেত প্রবল হইলে যত প্রকার মঙ্গল এইক্ষণে আমারদিগের মনে জাগ্রৎ রহিয়াছে, সকল সফল করিবার সামর্থ্য হইবে। এ দেশের রাজনিয়ম যাহাতে উৎকৃষ্ট হয়, অন্তায় কর স্থাপন খণ্ডিত হয়, শাস্তি রক্ষার সুশৃঙ্খলা হয়, বিচার কার্য সুসম্পন্ন হয়, কৃষিকার্যের বৃদ্ধি হয়, শিল্প কর্মের উন্নতি হয়, বাণিজ্যের বিস্তার হয়, এবং যাহাতে এ দেশস্থ লোকের সুখ স্বচ্ছতা সম্যক্ প্রকারে বৃদ্ধি হয় তাহা এই ঐক্য দ্বারা সুসম্পন্ন করিতে চেষ্টাবান् হইতে পারিব। এইক্ষণে ভরসার সহিত সেই স্থখের দিবসকে প্রতীক্ষা করিতেছি যখন ভারতবর্ষস্থ লোক আপনারদিগের বৃদ্ধি ও ক্ষমতা দ্বারা সমুদ্র পোত নির্মাণ করিবেক, সেতু রচনা করিবেক, বাংল যন্ত্র প্রস্তুত করিবেক, এবং স্বদেশোৎপন্ন জ্বর্য দ্বারা স্বদেশে নানা প্রকার শিল্প কার্যের উন্নতি করিবেক। কিন্তু এইক্ষণে যে এই সকল মঙ্গলের চিহ্ন দেখিতেছি, এবং ভবিষ্যৎ মঙ্গলের প্রত্যাশাতে পুলাকিত হইতেছি, ইহার মূল কোথায়? নদীর শ্রেতে স্লিপ হইয়া তাহার উৎপত্তি স্থান অব্বেষণ করিলে যে প্রকার পর্বত শিখরের প্রতি দৃষ্টি হয়, বায়ুপ্রবাহে সৌগন্ধের প্রাণ প্রাপ্ত হইয়া তাহার আকর অব্বেষণ করিলে যে প্রকার মনোহর পুষ্পোদ্ধানের শ্বরণ হয়, তজ্জপ এই বর্তমান জ্ঞানের বৃদ্ধি ও তৎফল সৌভাগ্যের উপক্রম আলোচনা করিয়া সেই প্রম হিতৈষির নাম ও সেই প্রম দয়ালু ব্যক্তির চরিত্র শ্বরণ হইতেছে, যাহার উপকার দ্বারা এ দেশ পূর্ণ রহিয়াছে, যাহার দয়াকে হৃদয়ঙ্গম করিয়া ভারতবর্ষের লোক কৃতজ্ঞতা

বসে আর্জ রহিয়াছেন, যাহার নামকে স্থায়ি করিবার জন্য এই সাম্বৎসরিক সভা প্রতিষ্ঠিত হইয়াছে, এবং যাহার গুণামূল্যাদ করিবার জন্য আমরা অন্ত এই অট্টালিকাতে একত্র হইয়াছি—এই মহাত্মার নাম শ্রীযুক্ত ডেবিড হেয়ার সাহেব। তাহার এই সত্য জ্ঞান ছিল, যে পরের উপকার জন্য তাহার জন্ম, এবং পরের উপকার তাহার জীবনের সমুদয় কার্য; এবং শরীর, বুদ্ধি, সম্পত্তি সমুদয় তিনি পরের হিতের জন্য সমর্পণ করিয়াছিলেন। তিনি স্বদেশ হইতে ভারতবর্ষকে ভিন্ন জানিতেন না। এই সত্যের প্রতি তাহার দৃঢ় প্রত্যয় ছিল, যে পৃথিবী তাহার জন্মভূমি, এবং সমুদয় মুহূর্য তাহার পরিবার। বিশেষতঃ তাহার চরিত্র তখন বিশেষ রূপে হৃদয়ঙ্গম হয়, যখন এ দেশের বিদ্যা উন্নতির প্রতি দৃষ্টিপাত করা যায়। কিন্তু বৎসর পূর্বে এদেশ অজ্ঞান তিমিরে আচ্ছন্ন ছিল। কিন্তু তিনি এ দুরবস্থা সহ করিতে না পারিয়া এই অঙ্ককারময় ভারতবর্ষকে জ্ঞানালোকে উজ্জ্বল করিতে যত্নবান্ন হইলেন, এবং লোকের স্বারে স্বারে ভ্রমণ করিয়া তাহার প্রতিজ্ঞাত কার্য অনেক ভাগে সম্পন্ন করিয়াছিলেন। এই মহোপকার সাধন জন্য তিনি শারীরিক ক্লেশ, মানসিক পরিশ্রম, অর্থের ব্যয় ইত্যাদি কোন্ প্রকারে ষড় না করিয়াছিলেন? এইক্ষণে আমরা যে কিছু জ্ঞান উপার্জন করিতেছি, সে কেবল তাহারই প্রসাদাং। তাহার প্রসাদাং আমরা স্মষ্টির নিয়ম সকল জ্ঞাত হইতেছি, তাহার প্রসাদাং সূর্য নক্ষত্রাদির স্বত্বাব জানিতেছি, তাহার প্রসাদাং গ্রহ চক্র ধূমকেতুর দূর, পরিমাণ, এবং গতিবিধি সকল শিক্ষা করিতেছি, তাহার প্রসাদাং পৃথিবীস্থ স্বদেশ বিদেশাদি সমূহ স্থানের বৃত্তান্ত আলোচনা করিতেছি, তাহার প্রসাদাং আমরা আপনারদিগের শরীরের নিয়ম, মনের স্বত্বাব, নীতিজ্ঞান প্রভৃতি নানা বিদ্যা লাভ করিতেছি, অধিক কি কহিব, তাহার প্রসাদাং আমরা এক নৃতন প্রকার জ্ঞান ভূমিতে আরোহণ করিয়াছি। ভারতবর্ষের মহৎ বিদ্যালয় যে হিন্দু কালেজ, তাহা স্থাপনের

মূলাধার কারণ কোন্ ব্যক্তি ?—সকলেই অবশ্য ব্যক্তি করিবেন যে শ্রীযুক্ত ডেবিড হেয়ার সাহেব। বঙ্গভাষাকে উন্নত করিবার জন্য প্রথম যত্নবান্ কোন্ মহুষ ?—ডেবিড হেয়ার সাহেব। উপদেশ দ্বারা চিকিৎসা বিদ্যা, বিস্তার জন্য মহোৎসাহী কোন্ পুরুষ ?—ডেবিড হেয়ার সাহেব। অশেষ মঙ্গলের কারণ যে মুদ্রাযন্ত্র তাহার স্বাধীনতা স্থাপনে বিশেষ উদ্দেশ্য কোন্ মহাঞ্চা—ডেবিড হেয়ার সাহেব। এই রূপে এদেশের জ্ঞান বৃক্ষের কারণ সন্ধান জন্য যে প্রশ্ন করা যায়, সেই প্রশ্নের উত্তরেই ভারতবাজ্যের বিদ্যা রূপ বৃক্ষমূলে হেয়ার সাহেবকে বীজ রূপে দৃষ্টি করা যায়। তিনি আমারদিগকে হৌরক দেন নাই, স্বর্ণ দেন নাই, রজতও দান করেন নাই, কিন্তু তাহার অপেক্ষা সহস্র গুণ—কোটি গুণ মূল্যবান্ বিদ্যারত্ন প্রদান করিয়াছেন। তাহার চেষ্টা দ্বারা আমরা জ্ঞানের আস্থাদ প্রাপ্ত হইয়াছি, এবং তাহার চরিত্রের দৃষ্টান্ত দ্বারা দয়া ও সত্য ব্যবহার যে কি মহোপকারি, তাহা পূর্ণ রূপে হৃদয়ঙ্গম করিয়াছি। পীড়িতের রোগ শাস্তি, বিপদ্গুস্তের দুঃখ মোচন, অবিজ্ঞকে পরামর্শ দান, নিরাশ্রয়কে আশ্রয় প্রদান ইত্যাদি হিতকার্য তাহার চরিত্রের ভূষণ ছিল। তাহার স্থাপিত বিদ্যালয়ের ছাত্রেরা তাহার দ্বারা কেবল বিদ্যারত্নের অধিকারী হয়েন নাই, তাহার স্নেহ ও প্রীতি দ্বারা সর্বদা লালিত হইয়াছিলেন। আহা, তাহার মনের ভাবকে চিন্তা করিলে চিন্তে কি আনন্দের উদয় হয় ! যখন আমারদিগের উপকারে তাহার প্রবৃত্তি হইল, তখন তাহার চিন্ত দয়াতে কি পরিপূর্ণ হইয়াছিল ! যখন তিনি সকল প্রতিবন্ধক মোচন করিয়া তাহার মানস সকল হইবার উপক্রম দেখিলেন, তখন কি আশ্চর্য মনোহর সন্তোষ তাহার অস্তঃকরণকে স্পর্শ করিয়াছিল ! যখন তাহার বাসনা বৃক্ষ যথেষ্ট রূপে ফলবান্ হইল, তখন তিনি আপনাকে কৃতার্থ জানিয়া কি মহানন্দে মগ্ন হইয়াছিলেন ! যিনি সকল স্বার্থ পরিত্যাগ পূর্বক কেবল আমার-দিগেরই উপকার করিয়া এমত আহ্লাদিত হইয়াছিলেন, তাহার নিমিত্তে

কি প্রকারে কৃতজ্ঞতা প্রকাশ করিব !—তাহার কি প্রকার ধন্তবাদ করিয়া তৃপ্তি থাকিব !

এই অতীব দুষ্পাপ্য পুস্তকখানির এক খণ্ড রাজা রাধাকান্ত দেবের লাইব্রেরিতে আছে।

৪। বাহু বস্ত্র সহিত মানব প্রকৃতির সম্বন্ধ বিচার। ১ম ভাগ—ইং ১৮৫১, পৃ. ২৯১। ২য় ভাগ—ইং ১৮৫২, পৃ. ২৮৯।

বাহু বস্ত্র সহিত মানব প্রকৃতির / সম্বন্ধ বিচার / প্রথম ভাগ / শ্রীঅক্ষয়-কুমার দন্ত কর্তৃক / প্রণীত / কলিকাতা / তত্ত্ববোধিনী মুদ্রায়স্বর্ত্রে মুদ্রিত / শকাব্দ ১৭৭৩।

এই পুস্তকের প্রথম ভাগের “বিজ্ঞাপন” হইতে কিয়দংশ উন্নত করিতেছি :—

হংখ নিবৃত্তি হইয়া স্মৃথি বৃদ্ধি হয় ইহা সকলেরই বাঞ্ছা, কিন্তু কি উপায়ে এই মনোবাঞ্ছা পূর্ণ হইতে পারে তাহা সম্যক্ কাপে অবগত না থাকাতে, মহুয় অশেষ প্রকার হংখ ভোগ করিয়া আসিতেছেন। অতি পূর্বাবধি নানা দেশীয় নৌতি-প্রদর্শক ও ধর্ম-প্রযোজক পণ্ডিতেরা এবিষয়ে বিস্তর উপদেশ প্রদান করিয়াছেন, কিন্তু কেহই কৃতকার্য্য হইতে পারেন নাই। অত্যাপি ভূমণ্ডল রোগ, শোক, জরা, দারিদ্র্য প্রভৃতি নানা প্রকার হংখে আকীর্ণ হইয়া রহিয়াছে। অতএব, এবিষয়ের যাহা কিছু জ্ঞাত হইতে পারা যায়, তাহা একান্ত যত্ন পূর্বক প্রচার করা সর্বতোভাবে কর্তব্য।

শ্রীযুক্ত জর্জ কুম্ব সাহেব-প্রণীত “কান্স্টিটিউশন আব ম্যান” নামক গ্রন্থে এবিষয় সুন্দরকল্প লিখিত হইয়াছে। তিনি নিঃসংশয়ে নিঙ্গপণ করিয়াছেন, যে পরমেশ্বরের নিয়ম প্রতিপালন করিলেই স্মৃথের উৎপত্তি হয়, এবং জ্ঞান করিলেই হংখ ঘটিয়া থাকে। জগদীশ্বর কি প্রকার

নিয়ম-প্রণালী সংস্থাপন করিয়া বিশ্ব-রাজ্য পালন করিতেছেন, এবং কোন্ নিয়মানুসারে চলিলে কিরণ উপকার হয়, ও কোন্ নিয়ম অতিক্রম করিলে কিম্বকার প্রতিফল প্রাপ্ত হওয়া যায়, এই গ্রন্থে তাহা স্পষ্টভাবে প্রদর্শিত হইয়াছে। এই গ্রন্থের অভিপ্রায় সমুদায় স্বদেশীয় লোকের গোচৰ' করা উচিত ও অত্যাবশ্রয়ক বোধ হওয়াতে, বাঙ্গলা ভাষায় তাহার সার সঙ্কলন পূর্বক ‘বাহু বন্ধুর সহিত মানব প্রকৃতির সম্বন্ধ বিচার’ নামক এক এক প্রস্তাব তত্ত্ববোধিনী পত্রিকাতে প্রকাশিত হইয়া আসিতেছে। ঐসমস্ত প্রস্তাব পাঠ করিয়া অনেকেই অনুরাগ প্রকাশ করিয়াছেন, এবং স্বতন্ত্র পুস্তকে প্রকটিত করিতে পরামর্শ দিয়াছেন। তদনুসারে, পুনর্বাব মুদ্রিত ও প্রচারিত হইতেছে। ইহা ইংরেজি পুস্তকের অবিকল অনুবাদ নহে। যে সকল উদাহরণ ইউরোপীয় লোকের পক্ষে সুসঙ্গত ও উপকাবজনক কিন্তু এদেশীয় লোকের পক্ষে সেৱন নহে, তাহা পরিত্যাগ করিয়া তৎ পরিবর্তে যে সকল উদাহরণ এদেশীয় লোকের পক্ষে সঙ্গত ও হিতজনক হইতে পারে, তাহাই লিখিত হইয়াছে। এদেশের পরম্পরাগত কুপ্রথা সমুদায় মধ্যে মধ্যে উদাহরণ স্বরূপে উপস্থিত করিয়া তাহার দোষ প্রদর্শন করা গিয়াছে। ফলতঃ, এতদেশীয় লোকে সবিশেষ মনোযোগ পূর্বক পাঠ করিয়া তদন্ত্যায়ি ব্যবহাব কবিতে প্রবৃত্ত হন, এই অভিপ্রায়ে আমি এই মানব প্রকৃতি বিষয়ক পুস্তক খানি প্রস্তুত করিয়া প্রকাশ করিতেছি।...কলিকাতা। শকা�্দ ১৭৭৩। ৮ পৌঁছ।

এই পুস্তকের দ্বিতীয় ভাগ প্রকাশিত হয় পর-বৎসর। ইহার আখ্যা-পত্রটি এইরূপ :—

বাহু বন্ধুর সহিত মানব প্রকৃতির / সম্বন্ধ বিচার / দ্বিতীয় ভাগ / শ্রীঅক্ষয়-
কুমার দত্ত কর্তৃক / প্রণীত / কলিকাতা / তত্ত্ববোধিনী সভাৰ মুদ্রাবন্দে মুদ্রিত /
শকা�্দ ১৭৭৪ /

লেখক “বিজ্ঞাপনে” লিখিয়াছেন :—

এই গ্রন্থে যে সমস্ত সর্বশুভদায়ক বিষয়ের বিবরণ করা গেল, যখন বিদ্যালয় সমূদায় সেই সকল বিষয় অধ্যয়ন অধ্যাপনার স্থান হইবে, যখন ধর্মোপদেশকেরা পরমেশ্বরের সেই সমস্ত প্রিয় কার্যকে তাহার উপাসনার অঙ্গ বলিয়া উপদেশ প্রদান করিবেন, এবং সাংসারিক আচার ব্যবহার ও বিষয়-চেষ্টা নিরবচ্ছিন্ন নৈসর্গিক নিয়মানুসারে সম্পন্ন হইয়া বিষয়কার্য এবং জ্ঞান ও ধর্মানুষ্ঠান একীভূত হইয়া যাইবে, তখন মনুষ্যনামের গোরব বক্ষা পাইয়া উত্তরোত্তর তাহার পূর্ণাবস্থা সম্পন্ন হইতে থাকিবে।
কলিকাতা শকা�্দ ১৭৭৪। ১০ মাঘ।

এই পৃষ্ঠাকের দুই খণ্ডেরই শেষে “সকলিত শব্দ সমূদায়ের ইংরেজি অর্থ” দেওয়া আছে। যাহারা পরিভাষা লইয়া আলোচনা করেন তাদের কাজে লাগিতে পারে মনে করিয়া আমরা নিম্নে ইহার কিছু কিছু উন্নত করিলাম :—

অনুচিকৌৰ্য	...	Imitation
অনুমিতি	...	Causality
আকারানুভাবকতা	...	Faculty of Form
আশ্চর্য	...	Faculty of Wonder
আসঙ্গ লিপ্সা	...	Adhesiveness
ইতর জন্ম	...	Lower animals
উপমিতি	...	Faculty of Comparison
কার্যকারণভাব	...	Causation
কালানুভাবকতা	...	Faculty of Time
গোমসূর্যাধান	...	Vaccination
ঘটনানুভাবকতা	...	Eventuality
জীৱিবিবা	...	Love of life
জীৱনী শক্তি	...	Vital power

জুগোপিষা	...	Secretiveness
নৈসর্গিক	...	Natural
অতিবিধিসা	...	Combativeness
মেম্মেরতত্ত্ব	...	Mesmerism
রসায়ন	...	Chemistry
বৃত্তি	...	Faculty
শারীরবিধান	...	Physiology
শারীরস্থান	...	Anatomy
শ্রমোপজীবী	...	Labourer
সমসংস্থান	...	Equilibrium
লক্ষণ	...	Stratum
*	*	*
অধিবেদন	...	Polygamy
ক্ষিপ্তনিবাস	...	Lunatic Asylum
পদাৰ্থবিজ্ঞা	...	Natural Philosophy
মনোবিজ্ঞান	...	Mental Philosophy
ক্লড় পদাৰ্থ	...	Elements
সোক্যাত্রাবিধান	...	Political Economy
বাণিজ্যাবিষয়ক স্বতন্ত্রতা	...	Freedom of trade
সাধারণতত্ত্ব	...	Republic
হৃতভবিষেক	...	Phrenology

৫। চারুপাঠ। ১ম ভাগ—ইং ১৮৫২ ; ২য় ভাগ—ইং ১৮৫৪ ;
৩য় ভাগ—ইং ১৮৫৯।

প্রথম ভাগের “বিজ্ঞাপনে” গ্রন্থকার লিখিয়াছেন :—

চারুপাঠের প্রথম ভাগ প্রস্তুত ও প্রচারিত হইল। এ গ্রন্থ যে
নামা ইঙ্গৰেজী পুস্তক হইতে সংকলিত, ইহা বলা বাহুল্য। যে সকল

প্রস্তাব ইহাতে সংগৃহীত হইল, তাহার অধিকাংশ তত্ত্ববোধিনী পত্রিকাতে
এবং একটি প্রস্তাব প্রভাকর পত্রে প্রথম প্রকটিত হয়। অবশিষ্ট কয়েকটী
বিষয় নৃতন রচিত হইয়াছে।...৪ষ্ঠা শ্রাবণ, শকাব্দঃ ১৭৭৪।

১৭৭৬ শকের শ্রাবণ মাসে ইহার দ্বিতীয় ভাগ প্রকাশিত হয়।

দ্বিতীয় ভাগের “বিজ্ঞাপনে”র তারিখ—“২২ আষাঢ়। ১৭৮১ শক।”

৬। বাঞ্চীয় রথারোহীদিগের প্রতি উপদেশ। ইং ১৮৫৫।

পৃ. ২০।

এই পুস্তিকা আমি এখনও দেখি নাই। বিলাতের ইঞ্জিয়া আপিস
লাইব্রেরিতে ইহার এক খণ্ড আছে। ইহা যে ১৮৫৫ শ্রীষ্টাব্দে প্রকাশিত,
তাহা ‘সংবাদ প্রভাকর’ (১ বৈশাখ ১২৬২) হইতে উন্নত নিম্নাংশ পাঠ
করিলেই জানা যাইবে :—

চৈত্র [১২৬১]...শ্রীযুত বাবু অক্ষয়কুমার দত্ত “বাঞ্চীয় রথাবোহি-
দিগের প্রতি উপদেশ” নামে একখানি ক্ষুদ্র পুস্তক প্রচার করিয়াছেন।

১৭৭৭ শকের আষাঢ় সংখ্যা ‘তত্ত্ববোধিনী পত্রিকা’র শেষে দুই আনা
মূল্যের এই পুস্তকাখানির একটি বিজ্ঞাপন মুদ্রিত হইয়াছে।

৭। ধর্মোন্নতি সংসাধন বিষয়ক প্রস্তাব। ইং ১৮৫৫।

পৃ. ২৬।

আমি এই পুস্তিকাখানি দেখি নাই। বিলাতের ব্রিটিশ মিউজিয়মে
ইহার এক খণ্ড আছে। অক্ষয়কুমার ১৮৫৪ শ্রীষ্টাব্দে ভবানীপুর আক-
সমাজে যে পাঁচটি বক্তৃতা করেন, তাহার শেষ বক্তৃতাটিই আলোচ্য
পুস্তিকার বিষয়বস্তু। এই মে বক্তৃতাটি ১৭৭৭ শকের বৈশাখ সংখ্যা
‘তত্ত্ববোধিনী পত্রিকা’তে প্রথমে প্রকাশিত হয়।

৮। ধর্মনীতি। ইং ১৮৫৬।

“বিজ্ঞাপনে” গ্রন্থকার লিখিয়াছেন :—

ধর্মনীতি প্রথম ভাগ প্রচারিত হইল। ইহা কোন গ্রন্থের অবিকল অনুবাদ নহে; নানা ইংরেজি গ্রন্থ অবলম্বন করিয়া লিখিত হইয়াছে। ইহার এক এক অংশ প্রথমে তত্ত্ববোধিনী পত্রিকায় প্রকাশিত হয়; এক্ষণে সেই সমুদায় সঙ্গলন পূর্বক স্বতন্ত্র পুস্তক করিয়া প্রচার করা যাইতেছে।

এই গ্রন্থ মুদ্রিত করিতে আরম্ভ করিবার পর আমি কোন উৎকৃষ্ট [পীড়ায়] পীড়িত হইয়াছি। এই নিমিত্ত কয়েক মাসাবধি ইহার প্রচার-বিষয়ে একবাবেই নিরস্ত ছিলাম। পরে অনেকে এই পুস্তক পাঠ কবিবার জন্য সাতিশয় ব্যগ্রতা প্রকাশ করাতে, এক্ষণে সত্ত্বেই শেষ করিয়া দিতে হইল।... ১০ই মাঘ। শকাব্দাঃ ১৭৭৭।

রচনার নির্দশন হিসাবে এই পুস্তক হইতে কয়েক পংক্তি উন্নত হইল :—

পরমেশ্বর মহুষ্যকে যে সমস্ত উৎকৃষ্ট গুণে ভূষিত করিয়াছেন, তামধ্যে ধর্ম সর্বাপেক্ষা প্রধান। তিনি ভূমণ্ডলস্থ সমুদয় প্রাণীকেই ইন্দ্রিয়-স্বীকৃতি সম্পূর্ণে সমর্থ করিয়াছেন, তাহার মধ্যে মহুষ্যকে জ্ঞান ও ধর্ম লাভে অধিকারী করিয়া সর্বাপেক্ষা শ্রেষ্ঠ করিয়াছেন। এই দুই বিষয়ের ক্ষমতা থাকাতে, মহুষ্য-নামের এত গৌরব হইয়াছে, এবং এই দুই বিষয়ে কৃতকার্য হইলেই মহুষ্যের যথার্থ মহত্ব উৎপন্ন হয়। স্বীকৃত যে এমন অনির্বচনীয় পরম প্রার্থনীয় পদার্থ, ধর্মস্বরূপ রংজ্যোত্তি তদপেক্ষাও শতগুণ উৎকৃষ্ট।

৯। পদাৰ্থ বিজ্ঞা। ইং ১৮৫৬।

ইহার ৮ম সংস্করণের “বিজ্ঞাপনটি” এইরূপ :—

পদাৰ্থ বিজ্ঞা নানা ইংরেজী গ্রন্থ হইতে সংগৃহীত ও অনুবাদিত হইয়াছে একথা বলা বাহ্যিক। উহার এক এক অংশ প্রথমে তত্ত্ববোধিনী

পত্রিকায় প্রকাশিত হয়। অনন্তর সেই সমুদায় সংকলন পূর্বক ১৭৭৮
শকের শ্রাবণ মাসে স্বতন্ত্র পুস্তক করিয়া প্রকটিত করা হয়। এক্ষণে
উহা অষ্টমবার মুদ্রিত হইল। এবাবে কিছু কিছু সংশোধন ও পরিবর্তন
করিয়া দিলাম।

রচনার নির্দর্শন :—

জড় ও জডের গুণ।

চক্ষু, কর্ণ, নাসিকা প্রভৃতি ইন্দ্রিয় দ্বারা যে সকল বস্তু প্রত্যক্ষ করা
যায়, সে সমুদায়ই জড় পদার্থ।

জড় পদার্থ দুই প্রকাব ; সজীব ও নিজীব। যাহাব জীবন আছে,
অর্থাৎ যথাক্রমে জন্ম, বৃদ্ধি, হ্রাস ও মৃত্যু হয় তাহাকে সজীব কহে ;
যেমন পশু, পক্ষী, কীট, পতঙ্গ, বৃক্ষ, লতা ইত্যাদি। আর যাহাব জীবন
নাই, স্ফুরাং যথাক্রমে জন্ম, বৃদ্ধি, হ্রাসাদি হয় না, তাহাকে নিজীব
বলা যায়, যেমন প্রস্তর, মৃত্তিকা, লোহ ইত্যাদি।

যে বিদ্যা শিক্ষা করিলে নিজীব জড় পদার্থের গুণ ও গতিব বিষয়
জ্ঞাত হওয়া যায়, তাহার নাম পদার্থ-বিদ্যা।

১০। **ভারতবর্ষীয় উপাসক-সম্প্রদায়।** ১ম ভাগ—ইং ১৮৭০ ;
২য় ভাগ—ইং ১৮৮৩।

ইহার ১ম ভাগের (পৃ. ১০৬+২১৪) আখ্যা-পত্রটি এইরূপ :—

The / Religious Sects / of the / Hindus / ভারতবর্ষীয় উপাসক-
সম্প্রদায়। / শ্রী অক্ষয়কুমার দত্ত প্রণীত। / প্রথম ভাগ। / কলিকাতা। / সংস্কৃত,
নূতন সংস্কৃত ও / গিরিশবিহারী-যন্দ্রে মুদ্রিত / ১২৭৭। /

এই গ্রন্থের “উপক্রমণিকা” ভাগ হইতে কিঞ্চিৎ উন্নত করিতেছি :—

কিরণে। এই উপাসক-সম্প্রদায় রচিত ও সংগৃহীত হইল, এক্ষণে
পাঠকগণকে অবগত করা আবশ্যিক। কাশীর রাজাৰ মুসী শীতল সিংহ

ও তত্ত্ব কালেজের পুস্তকালয়ের অধ্যক্ষ মথুরানাথ ইঁহারা প্রত্যেকে পারসীক ভাষায় এ বিষয়ের এক এক খানি গ্রন্থ প্রস্তুত করেন। ঐ দুই পুস্তকে বিবিধ সম্প্রদায়ের প্রবর্তন ও আচরণাদি সংক্রান্ত বহুতর বৃত্তান্ত বিনিবেশিত হয়। আর নাভাজি ও নারায়ণ দাসের বিচিত্র হিন্দী ভজ্ঞমালে, প্রিয়দাস কর্তৃক ব্রজ-ভাষায় লিখিত তদীয় টীকায়, বাঙ্গলা ভাষায় কৃষ্ণদাসের কৃত সেই টীকার সবিস্তর বিবরণে এবং ভারতবর্ষীয় বিভিন্ন ভাষায় বিচিত্র অপরাপর বহুতর সাম্প্রদায়িক গ্রন্থে বৈষ্ণব সম্প্রদায় সমূহের প্রবর্তক ও অন্য অন্য ভজ্ঞগণ সম্বন্ধীয় অনেকানেক উপাখ্যান এবং নানা সম্প্রদায়ের কর্তব্যাদি বিবিধ বিষয় সন্নিবেশিত আছে। সুবিখ্যাত পণ্ডিত শ্রীমান् হ, হ, উইল্সন্ ঐ দুই পারসীক পুস্তক এবং হিন্দী ও সংস্কৃতাদি ভাষায় রচিত ভজ্ঞমাল প্রভৃতি অন্য অন্য সাম্প্রদায়িক গ্রন্থ দর্শন করিয়া ইংরেজী ভাষায় হিন্দু ধর্মাবলম্বী উপাসক-সম্প্রদায় সমূদায়ের ইতিহাস বিষয়ের দুইটি প্রবন্ধ রচনা করেন। এসিয়াটিক রিসার্চ, নামক পুস্তকাবলীর ষোড়শ ও সপ্তদশ খণ্ডে তাহা প্রথম প্রকাশিত হয়। আমি তাহার সেই দুই প্রবন্ধকেই অধিক অবলম্বন করিয়া বাঙ্গলা ভাষায় পঞ্চাং-প্রস্তাবিত সম্প্রদায় সমূহের অনেকাংশের ইতিবৃত্ত সংকলন করিয়াছি। স্থানে স্থানে কিছু কিছু পৰিবর্তন, পৰিবর্জন ও সংযোজন করা হইয়াছে একথা বলা বাহ্যিক। তদ্দ্বিতীয়, এই প্রথম ভাগে রামসনেহী, বিথল-ভজ্ঞ, কর্ত্তাভজা, বাউল, শাড়া, সাঁই, দরবেশ, বলবামী প্রভৃতি আর ২২ বাইশটি সম্প্রদায়ের বিবরণ অঙ্গরূপে সংগৃহীত হইয়াছে। তাহার মধ্যে দুইটির বৃত্তান্ত পুস্তকান্তর হইতে নৌত, অবশিষ্ট ২০ কুড়িটির বিষয় নৃতন সংকলিত।

ন্যূনাধিক ২২ বাইশ বৎসর অতীত হইল, এই পুস্তকের অনেকাংশ প্রথমে তত্ত্ববোধিনী পত্রিকাতে প্রকটিত হয়। এতাদৃশ বহু পূর্বের লিখিত পুস্তক পুনঃ-প্রচারিত করিতে হইলে, তাহা বিশেষকৃপ সংশোধন করা

আবশ্যক। কিন্তু আমার শরীরের বেরপ শোচনীয় অবস্থা ঘটিয়া রহিয়াছে, তাহা ভদ্র-সমাজে একেবারে অবিদিত নাই।—শকাব্দ ১৭৯২।

১৮০৪ শকের চৈত্র মাসে এই গ্রন্থের দ্বিতীয় ভাগ প্রকাশিত হয়।

ওয়াল ভাগ অক্ষয়কুমার প্রকাশ করিয়া যাইতে পারেন নাই। তবে তাহার মৃত্যুর পর ইহার পাঞ্চলিপি হইতে মাসিক পত্রে কিছু কিছু প্রকাশিত হইয়াছে, যথা—

- (১) “শিবনারায়ণী সম্পদায়”—‘সাহিত্য’, বৈশাখ ১৩০৬।
- (২) “ভাৱতবৰ্ষীয় উপাসক সম্পদায়”—‘প্ৰবাসী’, শ্রাবণ ১৩১১।

১। প্রাচীন হিন্দুদিগের সমূজ্যবাক্তা ও বাণিজ্য বিস্তার।
ইং ১৯০১। পৃ. ২০৯।

এই পুস্তকখানি শ্রীরঞ্জনীনাথ দত্ত-সম্পাদিত। সম্পাদক “বিজ্ঞাপনে”
লিখিতেছেন :—

আমার পূর্ব পূজনীয় স্বর্গীয় পিতা অক্ষয়কুমার দত্ত মহাশয়
ভারতের প্রাচীন বাণিজ্য বিষয়ক একটি প্রেক্ষ লিখিয়াছিলেন। ইহার
আকার নৃনাধিক ৩৬ পৃষ্ঠা হইবে। সেই প্রেক্ষটি এই পুস্তকের
মেঝে দণ্ড।...”

পত্রাবলী

যোগীজ্ঞনাথ বস্তু তাহার পিতা রাজনারায়ণ বস্তুকে মেদিনীপুরে
লিখিত অক্ষয়কুমার দত্তের কতকগুলি পত্রের অংশ-বিশেষ ১৩১১ সালের

ফাস্তন সংখ্যা 'প্রবাসী'তে (পৃ. ৫৭১-৮০) প্রকাশ করিয়াছেন। ইহার
কিছু কিছু নিম্নে উন্নত হইল :—

মাতৃভক্তি ।

আমি শারীরিক এক প্রকার সুস্থ আছি। কিন্তু পরমারাধ্য মাতা'
ঠাকুরাণীর চরমাবস্থা উপস্থিত বোধ হইতেছে। বোধ হয় তাহার স্বেচ্ছময়
মুখ্যগুল আৱ অধিক দিন দেখিতে পাইব না। বোধ হয় এত দিন পৰে
আমাৱ একান্ত অকৃত্ৰিম স্বেচ্ছা প্রাপ্তিব প্ৰজ্যাশা উন্মুলিত হইল। যদিই
তাহাই ঘটে, আপনকাৱ রচিত, মধুময়, শোকসংহারক প্ৰস্তাৱটি পাঠ
কৱিব।

*

*

*

সহাদয়তা ।

আপনি দৱিদ্ৰ' প্ৰজাদিগেৱ দুঃখে দুঃখিত হইয়া যেৱপ ক্ৰন্দন
কৱিয়াছেন তাহাতে অন্তঃকৰণ ব্যাকুল হইয়া উঠিল। ব্যাকুল হওয়া ও
ক্ৰন্দন কৰা এইমাত্ৰ আমাদেৱ ক্ষমতা। এ যাত্ৰা এইৱপ কৱিয়াই পৰমায়
ক্ষেপণ কৱিতে হইল।

*

*

*

বাঙালা সাহিত্যেৰ উন্নতি ।

তথাকাৱ বাঙালা পাঠশালায় এক পুস্তকালয় প্ৰস্তুত কৱিবাৰ
উদ্ঘোগ হইতেছে, ইহা অতি শুভসূচক বলিতে হইবে। বিশেষতঃ তদৰ্থে
নৃতন নৃতন গ্ৰন্থ অনুবাদিত বা রচিত হইলে বহু উপকাৱ হইবে তাহার
সন্দেহ নাই। বেলি সাহেব আপনাৱ প্ৰতি যে সকল গ্ৰন্থ প্ৰস্তুত কৱিবাৰ
ভাৱার্পণ কৱিয়াছেন তাহা লিখিতে অবশ্য বহু পৰিশ্ৰম হইবে, কিন্তু তদ্বাৰা
লোকেৱ বিস্তৱ উপকাৱ দৰ্শিবাৰ সন্তাৱনা। এক্ষণে এই সকল কাৰ্য
দ্বাৱাই এ দেশেৱ যথাৰ্থ হিত হইতে পাৱে।

*

*

*

বিধবাবিবাহ প্রচলন।

আপনি মেদিনীপুর অঞ্চলে বিধবাবিবাহ সম্পাদনার্থ সচেষ্টিত
আছেন শুনিয়া স্বীকৃত হইয়াছি। আমাকে তদ্বিষয়ের সমাচার লিখিতে
আলস্তু করিবেন না। বিদ্যাসাগরকে মনের সহিত আশীর্বাদ করিতেও
কৃটি করিবেন না। জয়োস্ত ! জয়োস্ত !

স্মৃতিসিকতা।

এবার অতিশয় স্মিন্দ হইয়া আপনার সহিত সাক্ষাৎ করিতেছি।
বৃত্তান্ত পরাস্ত হইয়াছে, দেবরাজ ইন্দ্র জয়ী হইয়াছেন এবং ৫, ৬, ৭
বৈশাখে [১২৫৮] রজনীযোগে অপর্যাপ্ত বারিবর্ষণ দ্বারা মেদিনী সুশীতল
হইয়াছে। বৃত্তকে পরাভূত দেখিয়া পবনরাজও দেবরাজের সহকারী
হইয়া সকল বায়ু সুস্থ করিয়াছেন। কিন্তু বৃত্তান্ত এখানে পরাস্ত হইয়া
পলায়ন পূর্বক দক্ষিণ দিকে [অর্থাৎ মেদিনীপুরে] গিয়া উদয় হয় এই
আমার শঙ্কা হইতেছে। আপনি তাহার তথ্য সংবাদ লিখিয়া বাধিত
করিবেন। কিন্তু আমার নিতান্ত প্রার্থনা মেখানেও ইন্দ্রদেবের জয়পতাকা
উড়োয়মানা হয় এবং অবিলম্বে আপনার শরীর স্বস্মিন্দ হইবার সংবাদ
প্রাপ্ত হই।

*

*

*

আপনাকে মহারাণীর ছয়থানি অমৃল্য মুখচন্দ্রমা পরিত্যাগ করিতে
হইবেক।

*

*

*

আপনি শারীরিক কিঙ্গপ আছেন লিখিবেন। শুনিলাম তথায়
মাথাঘোরা দ্বারে দ্বারে ঘুরিয়া বেড়াইতেছে; কিছু মন্ত্রতত্ত্ব করিবেন, যেন
আপনার বাটীর ত্রিসীমায় না আসিতে পারে। তব কি ? “বিষ্ণু
বিষমৌষধঃ।” বোধ করি, এই অথঙ্গনীয় নীতির উপর নির্ভর করিয়া

বড় বাবু [মহর্ষি দেবেন্দ্রনাথ ঠাকুর] আপনাকে অভয়দান দিয়া গিয়াছেন। আপনি প্রাতঃস্নান করিবেন, ফলের জল পান করিবেন, উষা ও সাম্যঃকালের বায়ু সেবন করিবেন, আর ঘটটিকে একটু একটু চালনা করিবেন। আর নিজে হইতে কোন মতে মাথা ঘোরাইবেন না।¹

মহেন্দ্রনাথ বিশ্বানিধি-লিখিত জীবনীতেও অক্ষয়কুমারের ছই-চার-খানি পত্র মুদ্রিত হইয়াছে।



